

Ini Sa Igsulat I DANIYÉL

Ini Denu Sa Igsulat I Daniyél

Melaud pelà Daniyél i egoh sa medoo sundalu tegeBabiloniya anay migtaban diyà sa tanà Huda (basa ko diyà 2 Medoo Datù 24:1). Iya sa egoh i Daniyél nesigkem, lapeg sa medoo дума di melaud kedu diyà sa malayan sa datù Hudiyu. Inuwit sa medoo tegeBabiloniya kagda anì duen tandà sa egoh di nesakup dé sa tanà Huda diyà sa kedatuan sa datù tegeBabiloniya. Dodoo apiya di pa nesigkem Daniyél i, tinabangan i Nemula doo anì mebaluy tigtu ulu-ulu diyà sa kedatuan i Datù Nabokonosol.

Nekelapeg siini libelu diyà sa medoo libelu denu sa kagi i Nemula igpesugkow di diyà sa medoo etaw di Hudiyu apiya di pa endà duen sa kagi di eg-indaw diyà sa medoo etaw nehagtay egoh iya. Iya polo denu siini libelu, duen sa duwa baed di. Sa muna baed di egtulon denu sa egoh i Daniyél eg-ugpà diyà sa tanà Babiloniya. Sa keduwa baed di denu sa medoo igpehaa i Nemula diyà kenagdi denu sa medoo endà pa egtebow. Si Hésus ma sa migtulù denu iya wé egoh di pelawà diyà tanà (basa ko diyà Matéyo 24) owoy nekeiling ma sa nehauwan i Huwan igsulat diyà sa libelu Kepehaa.

INI DENU SA NEBAELAN I DANIYÉL OWOY SA MEDOO LOYUK DI (1:1–6:28)

Denu Sa Kegalebek Da I Daniyél Diyà Sa Dalesan I Datù Nabokonosol

1 ¹Na, egoh di egkatin dé sa ketelu di gepalay sa lugay i Hoakim datù diyà sa tanà Huda, migpengayaw da Datù Nabokonosol i tegeBabiloniya diyà sa menuwa Héluasalém. ²Hê, pinandayà i Datù Nemula Datù Hoakim i tegeHuda anì melugpi i Datù Nabokonosol. Agulé egoh i Nabokonosol migpelikù Babiloniya dò, inuwit di ma sa дума langun taman kedu diyà sa Dalesan i Nemula, owoy igtagù di diyà sa bilik sa dalesan sa egpenemulawen di.

³Agulé sinugù i Datù Nabokonosol Aspinas i sa ulu-ulu diyà sa medoo egsugùsuguen di anì hemilien di diyà sa medoo tugod i Islaél nesigkem sa

medoo melaud anak sa datù owoy sa anak sa medoo liyu ulu-ulu ma. ⁴Iya sa etaw hemilien di sa mepion palas owoy melanih sa lawa di owoy épê netiigan owoy medoo sa netiigan di galebek owoy melabel penemdem anì tigtu mekegaga gumalebek diyà sa dalesan sa datù. Owoy igsugù di ma diyà si Aspinas anì tuluen di kagda sumulat owoy masa sa kagi etaw tegeBabiloniya. ⁵Owoy igsugù di ma anì mebegayan da sa duma mepion kaenen sa datù owoy inemen uman agdaw. Telu gepalay sa lugay da tuluen, agulé mebaluy da dé gumalebek diyà sa datù.

⁶Iya ngadan sa medoo duma tegeIslaél nehemilì si Daniyel, si Ananiyas, si Misaél owoy si Asaliyas, owoy anan da tugod i Huda. ⁷Dodoo duen sa magtu ngadan da binaelan sa ulu-ulu sa medoo egsugùsuguen sa datù. Na, si Daniyel iya sa kepengadan di si Bèltésasal, owoy si Ananiyas iya sa kepengadan di si Sadelak, owoy si Misaél pinengadanan di si Misak, owoy si Asaliyas pinengadanan di si Abédnigo.

⁸Na, iya sa ungayà i Daniyel kaenen di daa sa mepion mekaen owoy inemen di daa sa mepion meinem diyà sa kehaa i Nemula. Huenan di, migpegeni diyà si Aspinas anì pandayaen di kagdi endà egkaen owoy endà eg-inem sa medoo igmengana da diyà kenagda. ⁹Na, danà i Nemula, huenan di egketuuwan Aspinas i diyà si Daniyel. ¹⁰Dodoo inikagiyan di, guwaen di, “Egpesu a diyà sa datù, enù ka kagdi sa migsugù sa kaenen yu owoy sa inemen yu. Petow ki daa imatayan di aken amuk hauwen di kuna megasà dodoo atung megebù sa medoo duma ko.”

¹¹Na, duen sa tegebantay pineipat i Aspinas diyà si Daniyel owoy sa telu loyuk di. Agulé mig-ikagi Daniyel i diyà sa tegebantay kenagda, guwaen di, ¹²“Tukawi ko daa taman sepulù agdaw. Begayi ko daa kami tinabel owoy wayeg. ¹³Agulé setepeng ko sa palas ké diyà sa palas sa medoo batàbatà egkaen sa mepion kaenen igsugù sa datù, owoy amuk nehali sa kehaa ko kenami baeli ko dé sa ungayà ko.” ¹⁴Hê, tinuu di sa ungayà i Daniyel, owoy tinepengan di kagda taman sepulù agdaw.

¹⁵Agulé egoh di neelut dé sa sepulù agdaw, uman pa mepion sa palas da i Daniyel owoy uman da pa megebù diyà sa langun batàbatà migkaen sa medoo mepion kaenen igsugù sa datù. ¹⁶Huenan di, endà dé egmenganawen sa tegebantay kagda sa medoo mepion kaenen igsugù sa datù, dodoo tinabel daa sa mengana di kenagda.

¹⁷Na, binegayan i Nemula siini epat melaud tegeIslaél sa melabel penemdem da owoy sa egkegaga da meketiig sa medoo egbasawen. Owoy binegayan di ma Daniyel i sa egkegaga egselepang sa medoo egkehauwan owoy tegeinep.

¹⁸Na, egoh di neelut dé sa telu gepalay sa lugay da tuluen igsugù sa datù, agulé inuwit i Aspinas sa langun melaud mangay diyà sa taengan i Datù Nabokonosol. ¹⁹Agulé tinukid di kagda egsetawit, owoy hinaa di endà duen sa meketepeng diyà si Daniyel owoy si Ananiyas owoy si

Misaél owoy si Asaliyas. Huenan di, ginela di kagda sa kesaligan di. ²⁰Sumalà dé sa igsà sa datù diyà kenagda, netakep sepulù gulê sa hagda keketiig diyà sa keketiig sa medoo tegebael balitmata owoy sa medoo épê lambus eg-ugpà diyà sa tanà nesakupan sa kedatuan di.

²¹Na, mig-ugpà Daniyél i diyà sa metolol dalesan sa datù taman sa egoh di nekeuma sa anay palay i Silo tegePélsiya migkedatù diyà sa menuwa Babiloniya.^a

Ini Denu Sa Tegeinep I Nabokonosol

2 ¹Na, egoh di migkatin dé sa keduwa di gepalay sa lugay i Nabokonosol migkedatù, duen sa medoo tegeinep di. Huenan di, nebukul owoy endà ma egpeketudug di. ²Agulé igpeangay di sa medoo tegebael balitmata, owoy sa medoo épê lambus owoy sa medoo épê balakat owoy sa medoo épê netiigan tegeBabiloniya, anì ipesele pang di kenagda sa tegeinep di. Egoh da mig-angay egtaeng diyà sa datù, ³mig-ikagi diyà kenagda, guwaen di, “Egkebukul a enù ka endà netiigan ku duu sa selepangan sa tegeinep ku. Ungayà ku tulonen yu diyà kenak sa selepangan di.”

⁴Hê, migsagbi da diyà sa datù pineukit da diyà sa kagi etaw Amalék, guwaen da, “O Datù, ungayà ké kumelalù ka taman melugay. Tuloni ko kami sa tegeinep ko anì selepangan ké.”

⁵Migsagbi sa datù, guwaen di, “Tandai yu ini i. Amuk endà metulon yu duu sa tegeinep ku owoy sa selepangan di ma, ipetagpedtagped ku kiyu owoy ipegubal ku ma sa medoo dalesan yu. ⁶Dodoo amuk metulon yu sa tegeinep ku owoy mesele pang yu ma, duen doo sa untung ibegay ku diyà keni yu owoy tigtu oloen ku ma kiyu. Huenan di, tulon yu dé owoy sele pang yu ma sa tegeinep ku.”

⁷Mig-ikagi da duli, guwaen da, “O Datù, amuk tulonen ko daa diyà kenami sa tegeinep ko, tulonen ké ma diyà keniko sa selepangan di.”

⁸Migsagbi sa datù, guwaen di, “Netiigan ku egpeéngén-éngén yu daa, enù ka netiigan yu ma doo ipetuu ku sa inikagi ku. ⁹Amuk endà metulon yu duu sa tegeinep ku owoy amuk endà ma mesele pang yu duu, pigtamayan ku kiyu. Neseunut yu egbutbut owoy eg-akal kenak taman sa egoh di mehali sa penemdem ku. Na, tuloni yu dé aken sa tegeinep ku anì metiigan ku amuk megaga yu sumele pang.”

¹⁰Agulé migsagbi da, guwaen da, “O Datù, endà duen etaw diyà siini uwang tanà mekegaga diyà sa igsugù ko. Endà pa duen sa datù apiya di pa tigtu épê egkegaga sa migsugù iling iya wé diyà sa medoo tegebael balitmata owoy sa medoo épê lambus owoy sa medoo épê netiigan. ¹¹Tigtu

^a 1:21 Iya sa anay palay i Silo migkedatù sa lima latuh telu pulù owoy walu gepalay egoh i Hésus endà pa neetaw diyà tanà.

melikut baelan iya wé igsugù ko owoy endà duen sa mekebael éhê iya wé, liyu daa sa medoo nemula owoy endà eg-ugpà da diyà siini tanà.”

¹²Na, danà iya wé inikagi da, huenan di tigtu migbulit sa datù owoy egkelangget, owoy igsugù di ipeimatay sa medoo tegeBabiloniya épê netiigan. ¹³Huenan di, igsugkow da sa kesugù sa datù ipeimatay sa langun épê netiigan, lapeg si Daniyel owoy sa medoo duma di.

Ini Sa Egeh I Nemula Migpehaa Sa Selepangan Sa Tegeinep Diyà Si Daniyel

¹⁴Na, si Aliyu sa ulu-ulu sa medoo tegebantay sa sinugù sa datù peimatay sa medoo tegeBabiloniya épê netiigan. Agulé danà sa keketiig i Daniyel, huenan di pinepion di sa keikagi di diyà si Aliyu. ¹⁵Mig-igsà diyà kenagdi, guwaen di, “Maen di ya migsubela sa igsugù sa datù?” Agulé igpetumàmà i Aliyu diyà si Daniyel sa medoo egkebaelan da.

¹⁶Hê, mig-angay Daniyel i diyà sa datù owoy migpegeni pelà agdaw anì selepangan di sa tegeinep sa datù. ¹⁷Aglulé egoh di miglikù diyà sa dalesan di, igpetumàmà di diyà sa telu loyuk di si Ananias owoy si Misaél owoy si Asaliyas sa medoo egkebaelan da. ¹⁸Inikagiyan di kagda anì sumimbà da pehiduhidu diyà si Nemula, sa Nemula diyà langit, anì selepangan di diyà kenagda sa nelidung anì endà mekelapeg da mematay diyà sa medoo tegeBabiloniya épê netiigan. ¹⁹Aglulé egoh di sumigep dé, duen sa nehauwan i Daniyel kenà i Nemula migpehaa diyà kenagdi sa nelidung. Huenan di, inolò di Nemula i, sa Nemula diyà langit. ²⁰Mig-ikagi, guwaen di,

“Meolò Nemula i taman melugay,
enù ka kagdi sa épê keketiig owoy sa épê dakel egkegaga.

²¹Kagdi sa épê egkegaga egpeukit sa gai.

Owoy kagdi sa egbegay egkegaga diyà sa medoo datù, owoy kagdi ma sa kumedan sa egkegaga da.

Kagdi sa egbegay sa keketiig diyà sa medoo etaw épê netiigan owoy sa egbegay sa nesabutan diyà sa medoo épê kekesabut.

²²Igpehaa di sa medoo egpagitungen owoy sa medoo nelidung mebaelan.

Hauwen di sa medoo binaelan diyà deleman, owoy diyà kenagdi ma sa legdaw.

²³O Nemula sa egpigtuuwen sa medoo tupù ké,

egpesalamat a diyà keniko owoy eg-oloen ku ma kuna,

enù ka binegayan ko aken keketiig owoy bagel,

owoy sinagbian ko sa kesimbà ké,

enù ka igpehaa ko diyà kenak sa selepangan sa tegeinep sa datù.”

Ini Sa Egeh I Daniyel Migselepang Sa Tegeinep Diyà Sa Datù

²⁴Aglulé migpelikù Daniyel i diyà si Aliyu, sa sinugù sa datù atung mimatay sa medoo tegeBabiloniya épê netiigan. Inikagiyan di, guwaen

di, “Yaka eg-imatay duu sa medoo tegeBabiloniya épê netiigan. Uwit ko polo aken diyà si Datù enù ka selepangan ku sa tegeinep di.”

²⁵Hê, inuwit i Aliyu Daniyél i diyà sa datù, owoy mig-ikagi, guwaen di, “O Datù, duen sa etaw hinaa ku diyà sa medoo nesigkem kedu Huda dò sa mekegaga sumelepang sa tegeinep ko.”

²⁶Agulé mig-igsà sa datù diyà si Daniyél sa pinengadanan da Béltésasal, guwaen di, “Enù di ya atu, metulon ko sa tegeinep ku owoy sa selepangan di ma?”

²⁷Migsagbì Daniyél i, guwaen di, “O Datù, endà duen sa etaw épê netiigan ataw ka tegealamat ataw ka épê lambus ataw ka tegebael balitmata mekeselepang sa tegeinep ko nelidung. ²⁸Dodoo duen doo sa Nemula diyà langit sa egpehaa sa nelidung owoy igpehaa di diyà keniko, o Datù Nabokonosol, sa medoo mebaelan diyà sa agdaw tumbow. Na, ini sa palas sa tegeinep ko owoy sa medoo nehauwan ko egoh ko egtudug diyà sa kateli ko.

²⁹“O Datù, egoh ko egtudug, tinegeinep ko sa medoo mebaelan tumbow kani. Na, si Nemula sa egpeketiig sa medoo nelidung, kagdi sa migpehaa diyà keniko sa medoo tumbow. ³⁰Siini nelidung igpehaa i Nemula diyà kenak, beken duu danà di metiig a pa uman diyà sa liyu etaw, dodoo anì meselepang daa polo diyà keniko sa tegeinep ko owoy anì meketiig ka ma sa munoy niko penemdem, o Datù.

³¹“Na, o Datù, iya sa hinaa ko migtigdeg diyà sa taengan ko sa tigtu dakel inetaw mekesilang owoy mekepesu eghahauwen. ³²Tigtu bulawan sa ulu di, owoy pilak sa kagpa di owoy sa belad di. Tumbaga sa getek di owoy sa bubun di, ³³owoy putow sa kebetukan di, owoy putow neamutan demilag dinaigan sa takem lisen di. ³⁴Ligò ko eg-inengteng duu, duen sa batu nepugta kedu diyà sa tuduk dodoo beken danà etaw, owoy nekeepas diyà sa takem lisen sa inetaw. Hê, minelupet sa takem lisen di. ³⁵Agulé sa putow owoy sa demilag dinaigan owoy sa tumbaga owoy sa pilak owoy sa bulawan, anan da minelupet owoy nelayap lagà sa opoh diyà sa kenà eg-elik owoy endà dé duen sa nesamà. Dodoo nebaluy dakel tuduk sa batu nekesugat diyà sa inetaw owoy nelagkuban di sa uwang tanà.

³⁶“Iya sa tegeinep ko, owoy tulonen ku dé diyà keniko sa selepangan di. ³⁷O Datù, kuna sa datù miglowon diyà sa langun datù enù ka si Nemula, sa Nemula diyà langit, sa migbegay diyà keniko egkegaga owoy kedatuan owoy bagel owoy lalag. ³⁸Kuna sa pinedatù di diyà sa langun etaw owoy sa langun hinagtay owoy langun manuk eglayanglayang, anì ipaten ko sa langun sumalà dé sa kenà da. Kuna lagà sa ulu di bulawan sa inetaw.

³⁹“Dumuen sa kumematù mekesetugdug diyà keniko, dodoo endà meketepeng di diyà sa niko egkegaga. Agulé dumuen dema sa ketelu di kumematù sa pinelagaan tumbaga sa kumematù diyà siini sinukub langit.

⁴⁰Agulé dumuen dema sa keepat di mekesetugdug kumedatù mebagel lagà putow, enù ka putow sa mekelupet sa langun taman. Lagà putow iya wé kedatuan enù ka melupet di sa langun kedatuan nekehuna. ⁴¹Sa hinaa ko takem lisen di nesesawek putow owoy sa demilag dinaigan, iya sa selepangan di mepalak siini kedatuan, dodoo mebagel doo enù ka duen sa putow nekeamut diyà sa demilag dinaigan. ⁴²Sa hinaa ko kemel lisen di nesesawek putow owoy sa demilag dinaigan, iya sa selepangan di dumuen sa kenà di mebagel iya wé kedatuan owoy dumuen ma sa kenà di endà duen egkegaga. ⁴³Sa hinaa ko nesesawek putow owoy sa demilag dinaigan, iya lagà sa ungayà sa medoo datù mesesebaen sa medoo etaw da pineukit diyà sa kesesawaay. Dodoo endà iseg di melugay sa kesesebaenay da, lagà sa putow endà mekesawek di diyà sa demilag dinaigan.

⁴⁴“Na, amuk meuma dé sa kedatuan siedò medoo datù, si Nemula sa Nemula diyà langit sa mael sa sebaen kedatuan endà medaetan di taman melugay, owoy endà melugpì di sa medoo datù. Lupeten di polo sa medoo liyu kedatuan enù ka kedanan di sa hagda egkegaga, dodoo tumigdeg taman melugay sa hagdi kedatuan. ⁴⁵Iya sa selepangan sa batu hinaa ko nepugta kedu diyà sa tuduk, dodoo beken danà etaw, owoy nelupet danà sa batu sa putow owoy sa tumbaga owoy sa demilag dinaigan owoy sa pilak owoy sa bulawan. Na, si Nemula épê dakel egkegaga sa egpehaa diyà keniko, o Datù, sa medoo mebaelan kani diyà sa agdaw tumebow. Tigtu tuu sa tegeinep ko, owoy enget ma sa kineselepang.”

Ini Sa Egoh I Daniyel Nebegayan Untung

⁴⁶Agulé miglagkeb Datù Nabokonosol i diyà tanà enù ka eg-oloen di Daniyel i, owoy igsugù di ma anì duen sa ibegay da uloy owoy ulowon da ma sa lana mepion ngadeg anì adatan da kagdi. ⁴⁷Hê, mig-ikagi sa datù diyà si Daniyel, guwaen di, “Tigtu tuu sa niko Nemula. Kagdi sa tigtu Nemula diyà sa langun egpenemulawen owoy sa tigtu Datù diyà sa langun datù, enù ka binegayan di kuna egkegaga egselepang siini medoo nelidung.”

⁴⁸Agulé pinedakel sa datù Daniyel i owoy binegayan di sa medoo milagà langun taman. Ginelal di ma ulu-ulu diyà sa pelubinsiya Babiloniya owoy mebaluy ma kagdi sa kaunutan sa langun etaw di épê netiigan. ⁴⁹Hê, danà i Daniyel migpegeni, ginelal di ma Sadelak i owoy si Misak owoy si Abédnigo anì kagda sa tegeipat sa medoo egbaelan diyà sa pelubinsiya Babiloniya. Dodoo umugpà daa Daniyel i diyà sa metolol dalesan sa datù.

Ini Sa Egoh Da Egpenemula Sa Inetaw Bulawan

3 ¹Na, sebaen agdaw migsugù Datù Nabokonosol i egpetuwang sa inetaw bulawan. Duwa pulù owoy pitu kamitelu sa kehagtaw di

owoy duwa kamitelu owoy tengà sa kelabel di. Ihtagù di diyà sa sugud Dula diyà sa nesakupan sa pelubinsiya Babiloniya. ²Agulé igsasà di sa langun ulu-ulu, lapeg sa medoo kaunutan owoy sa medoo atung tegesaà owoy sa medoo tegeipat pilak owoy sa medoo tegeantang owoy sa langun épê galebek diyà sa nesakupan sa kedatuan di anì langun da lumenged amuk meuma sa kepista di sa inetaw igpebael di. ³Huenan di, nesetipon da langun enù ka miglenged da sa kepista sa inetaw pinetigdeg i Datù Nabokonosol, owoy migtigdeg da diyà sa taengan iya wé inetaw.

⁴Agulé migpetaled eg-ikagi sa atung tegepetiig, guwaen di, “Ini sa igsugù diyà sa langun etaw, muni dé sa keduan di ataw ka sa balangan kagi di. ⁵Amuk dinegen yu sa dagì sa tegbuli owoy sa dagì sa medoo liyu balangan dalemetan, lagkeb yu dé owoy penemula yu sa inetaw bulawan sa pinetigdeg i Datù Nabokonosol. ⁶Sumalà dé sa etaw endà lumagkeb owoy endà egpenemula iya wé, petow dé idugsù diyà sa apuy eglegleg diyà sa atung kenà egtemeg.”

⁷Huenan di, egoh da egdineg sa dagì tegbuli owoy sa dagì sa medoo liyu balangan dalemetan, miglagkeb sa langun balangan etaw kedu diyà sa langun balangan tanà owoy diyà sa langun balangan kagi etaw anì penemulawen da sa inetaw pinetigdeg i Datù Nabokonosol.

Ini Sa Egoh Sa Telu Loyuk I Daniyél Endà Migpangunut Diyà Sa Igsugù Sa Datù

⁸Na, egoh iya wé agdaw, duen duma etaw tegeBabiloniya mig-angay egtulon diyà sa datù sa binaelan sa medoo Hudiyu. ⁹Mig-ikagi da diyà si Datù Nabokonosol, guwaen da, “O Datù, ungayà ké kumelalù ka taman melugay. ¹⁰Duen sa uledin ko, o Datù, lumagkeb sa langun etaw amuk dinegen da sa dagì tegbuli owoy sa dagì sa medoo liyu balangan dalemetan anì penemulawen da sa inetaw bulawan. ¹¹Sumalà dé sa etaw endà lumagkeb owoy endà penemula sa inetaw, idugsù diyà sa apuy eglegleg diyà sa atung kenà egtemeg. ¹²Doodoo duen ma doo sa etaw Hudiyu ginelal ko ulu-ulu diyà sa medoo egbaelan diyà sa pelubinsiya Babiloniya, endà migpangunut da diyà sa igsugù ko, o Datù. Iya sa ngadan da si Sadelak owoy si Misak owoy si Abédnigo. Endà egpangunut da diyà sa egpenemulawen ko, owoy endà ma eglagkeb da egpenemula sa inetaw bulawan pinetigdeg ko.”

¹³Agulé tigtu egbulit Nabokonosol i owoy igpeangay di Sadelak i owoy si Misak owoy si Abédnigo. Hê, inuwit da kagda diyà sa taengan di. ¹⁴Agulé inigsaan di kagda, guwaen di, “O Sadelak owoy Misak owoy Abédnigo, tuu pa sa inikagi da sa egoh yu endà egpangunut diyà sa egpenemulawen ku, owoy sa egoh yu endà eglagkeb egpenemula sa inetaw bulawan pinetigdeg ku? ¹⁵Na, ini egoh di amuk dinegen yu sa dagì tegbuli owoy sa dagì sa medoo liyu balangan dalemetan, lagkeb yu depa owoy

penemula yu dé sa inetaw bulawan igpebael ku, anì endà dumuen sa medaet mebaelan yu. Dodoo amuk endà penemulawen yu duu, mekedugsù yu doo mapes diyà sa apuy egleleg diyà sa atung kenà egtemeg. Amuk hediya, ngadan sa nemula mekealuk keniyu kedu diyà sa egkegaga ku?”

¹⁶Hê, migsagbì Sadelak i owoy si Misak owoy si Abédnigo, guwaen da, “O Datù, endà duen sa isagbì ké keniko denu iya wé. ¹⁷Amuk mekedugsù ké diyà sa apuy egleleg diyà sa atung kenà egtemeg, si Datù Nemula sa egpangunutan ké sa mekealuk kenami kedu diyà sa apuy owoy alukan di doo kami kedu diyà sa egkegaga ko. ¹⁸Apiya di pa beken iya sa baelan di, metiigan ko doo sa egoh ké endà mangunut diyà sa egpenemulawen ko owoy sa egoh ké ma endà lumagkeb egpenemula sa inetaw bulawan pinetigdeg ko.”

Ini Sa Egoh Da Igdugsù Diyà Sa Apuy

¹⁹Hê, neumanan sa kebulit i Nabokonosol diyà si Sadelak, si Misak owoy si Abédnigo, owoy migkedaet sa pedu di diyà kenagda. Huenan di, igsugù di anì takepen pitu gulê sa keedup sa apuy diyà sa atung kenà egtemeg. ²⁰Agulé sinugù di sa medoo tigtu mebagel sundalu di anì poloten da kagda owoy ipedugsù di kagda diyà sa apuy egleleg diyà sa atung kenà egtemeg. ²¹Huenan di, pinolot da kagda owoy igdugsù da diyà sa atung kenà egtemeg tapay da doo épê ginis. ²²Hê, danà sa datù migsugù sa tigtu meedup apuy, huenan di minematay sa medoo etaw mig-angay egdugsù kenagda danà sa siloy di. ²³Dodoo kagda i telu pinolot, minenabù da diyà sa apuy egleleg diyà sa atung kenà egtemeg.

²⁴Agulé tigtu negaip Datù Nabokonosol i owoy petow dé migtigdeg. Hê, mig-igsà diyà sa medoo salu di, guwaen di, “Telu daa geetaw atu sa pinolot ta owoy igpedugsù ta diyà apuy?”

Agulé migsagbì da, guwaen da, “Hoò, o Datù.”

²⁵Dodoo mig-ikagi sa datù, guwaen di, “Haa yu! Epat geetaw polo sa eghauwen ku eg-ipanawpanaw diyà sa apuy. Endà nepolot da owoy endà ma egkedaig da. Èhê palas sa nemula sa keepat di.”

²⁶Huenan di, migpedapag Nabokonosol i diyà sa bengawan sa atung kenà da egtemeg, owoy mig-umow, guwaen di, “O Sadelak owoy Misak owoy Abédnigo, kiyu sa egsugùsuguen sa tigtu mapulù Nemula. Laun yu, angay yu dini.”

Hê, miglaun da telu. ²⁷Agulé nesetipon diyà kenagda sa medoo kaunutan owoy sa medoo ulu-ulu owoy sa langun épê galebek diyà sa datù. Hinaa da endà nedaig da diyà sa apuy. Apiya sa balut ulu da daa, endà nedabdaban di. Endà neulow sa kawal da, owoy endà ma duen ngadeg ebel diyà kenagda.

²⁸Agulé mig-ikagi Nabokonosol i, guwaen di, “Meolò sa Nemula da i Sadelak owoy si Misak owoy si Abédnigo. Pineangay di diyà kenagda sa

egsugùsuguen di anì mealukan sa medoo etaw di egسالig diyà kenagdi. Endà migpangunut da diyà sa igsugù ku denu sa kepenemula da sa inetaw, enù ka pinemaen da dé polo sa egoh da idugsù diyà sa apuy. Endà sumimbà da diyà sa liyu egpenemulawen, asal beken sa hagda Nemula. ²⁹Huenan di, migsugù a amuk duen sa etaw, sumalà dé sa balangan etaw ataw ka muni dé sa balangan kagi etaw, amuk umikagi da medaet denu sa Nemula da i Sadelak owoy si Misak owoy si Abédnigo, sepisangpisangen sa lawa di owoy gubalen ma sa dalesan di. Enù ka endà duen sa liyu nemula mekealuk iling iya wé.”

³⁰Agulé binegayan sa datù Sadelak i owoy si Misak owoy si Abédnigo sa dakel gelal diyà sa pelubinsiya Babiloniya.

Ini Sa Keduwa Di Gulé Egtegeinep Nabokonosol I

4 ¹Na, duen sa sulat igpeuwit i Datù Nabokonosol diyà sa langun balangan menuwa owoy diyà sa langun balangan etaw owoy diyà sa langun balangan kagi etaw. Ini sa kagi di nekesulat, guwaen di, “Ungayà ku kumetanà sa keugpà yu. ²Owoy ungayà ku ma tulonon ku kiyu sa medoo panduan owoy sa medoo egkegaipan etaw binaelan sa Nemula épê dakel egkegaga diyà kenak.

³Tigtu mekegaip sa medoo eghauwen owoy sa medoo panduan binaelan di.

Endà mekedan sa kedatuan di taman melugay, owoy endà ma duen taman sa egkegaga di.

⁴“Na, aken si Nabokonosol, mepion sa keugpà ku diyà sa metolol dalesan ku, owoy eglenuk sa naken kehagtayan. ⁵Dodoo duen sa tegeinep ku mekelimedang. Egoh ku diyà sa kateli ku, duen sa nehauwan ku mekelenaw. ⁶Huenan di, igpeangay ku sa langun etaw tegeBabiloniya épê netiigan anì ipeselepang ku diyà kenagda sa tegeinep ku. ⁷Hê, egoh da migtebow sa medoo tegebael balitmata owoy sa medoo épê lambus owoy sa medoo épê netiigan owoy sa medoo tegeantap, tinulonon ku kagda sa tegeinep ku. Dodoo endà negaga da duu egselepang diyà kenak. ⁸Agulé mig-angay Daniyél i diyà kenak owoy tinulon ku diyà kenagdi sa tegeinep ku. Na, kagdi sa pinengadanan ké Bêltésasal enù ka iya ngadan sa egpenemulawen ku, owoy diyà kenagdi sa suguy sa medoo nemula metiengaw.

⁹“Mig-ikagi a diyà kenagdi, guwaen ku, ‘O Bêltésasal kaunutan sa medoo épê balitmata, netiigan ku diyà keniko sa suguy sa medoo nemula metiengaw, owoy megaga ko sumelepang sa langun nelidung. Na, ini sa tegeinep ku. Tulon ko diyà kenak sa selepangan di. ¹⁰Duen sa nehauwan ku egoh ku egtudug. Hinaa ku sa kayu migtigdeg diyà teliwadà sa uwang tanà, owoy tigtu mehagtaw. ¹¹Migkegamel owoy migkehagtaw taman nekesekuk diyà langit, owoy tapay doo hauwen sumalà dé sa kenà ta

diyà siini sinukub langit. ¹²Metolol sa medoo daun di owoy medoo ma sa bunga di mekaen sa langun etaw. Eghelung sa medoo uled tanà diyà iya wé kayu, owoy egsalag ma sa medoo tukééy manuk diyà sa panga di, owoy dutu ma sa kenà da egkuwa kaenen sa langun eg-ipanawpanaw diyà tanà.

¹³“Agulé egoh ku telibubu egpenemdem denu iya wé, hinaa ku ma sa sebaen tegebantay egsugùsuguen i Nemula migpetuntun kedu diyà langit. ¹⁴Pinataled di sa kagi di, guwaen di, ‘Pilay yu sa kayu owoy tagged yu ma sa medoo panga di. Duttut yu sa medoo daun di owoy belégés yu ma sa medoo bunga di. Hegaw yu sa medoo uled tanà eghelung dahiya owoy sa medoo manuk egsalag diyà sa panga di. ¹⁵Dodoo pandayà yu dé sa tued di owoy sa dalid di tapay doo pinolot putow owoy tumbaga. Salidi yu dé diyà sa keluwenluwen.

“Pandayà yu dé sa egoh di mepelê aglù iya wé etaw owoy sa egoh di meseamut mugpà diyà sa medoo uled tanà diyà sa keluwenluwen. ¹⁶Mesambian penemdem hinagtay sa penemdem di taman pitu gepalay. ¹⁷Iya sa kepigtamay igpetiig sa medoo tegebantay egsugùsuguen i Nemula. Huenan di, metiigan doo sa langun etaw sa egoh i Nemula épê dakel egkegaga sa eg-ipat sa langun kedatuan sa etaw diyà tanà. Owoy megaga di ma eghalì sa kedatuan diyà sa etaw egkeiyapan di kumedatù, apiya di pa tigtu tukééy etaw.’

¹⁸“ ‘O Bèltésasal, iya sa tegeinep ku, aken i Datù Nabokonosol. Tuloni ko dé aken sa selepangan di, enù ka endà duen liyu etaw épê netiigan diyà sa nesakupan kedatuan ku sa mineketulon sa selepangan di diyà kenak. Dodoo kuna, megaga ko sumelepang iya wé enù ka diyà keniko sa suguy sa medoo nemula metiengaw.’ ”

Ini Sa Egho I Daniyel Migselejang Sa Tegeinep Sa Datù

¹⁹“Na, si Daniyel sa pinengadanan da Bèltésasal, tigtu nelenawan owoy nebukul egoh di migdineg sa inikagi sa datù. Huenan di, mig-ikagi Datù Nabokonosol i diyà kenagdi, guwaen di, ‘O Bèltésasal, yaka egkebukul la danà sa tegeinep ku ataw ka sa selepangan di.’

“Agulé migsagbì Bèltésasal i, guwaen di, ‘O Datù, mepion pa hedem amuk mebaelan polo diyà sa kuntelà ko sa selepangan sa tegeinep ko. ²⁰Na, hinaa ko sa kayu migkegamel owoy migkehagtaw taman nekesekuk diyà langit, owoy tapay doo eghauwen sumalà dé sa kenà ta diyà siini sinukub langit. ²¹Metolol sa medoo daun di, owoy medoo ma sa bunga di mekaen sa langun etaw. Eghelung sa medoo uled tanà dahiya owoy egsalag ma sa medoo manuk diyà sa panga di. ²²Kuna, o Datù, sa selepangan iya wé kayu, enù ka migkebagel ka owoy migkedakel sa egkegaga ko taman egpekesekuk diyà langit sa lalag ko, owoy egpekeuma diyà siini uwang tanà sa nesakupan kedatuan ko.’

²³“Mig-uman eg-ikagi Daniyél i, guwaen di, ‘O Datù, hinaa ko ma sa sebaen tegebantay egsugùsuguen i Nemula migpetuntun kedu diyà langit, sa migpetaled eg-ikagi, guwaen di, “Pilay yu sa kayu owoy pedaeti yu ma. Dodoo pandayà yu dé sa tued di diyà sa keluwenluwen tapay doo pinolot putow owoy tumbaga, owoy pandayà yu ma sa dalid di diyà tanà. Pandayà yu mepelê aglù sa etaw, owoy pandayà yu ma anì mekeiling sa uled tanà sa keugpà di taman pitu gepalay.”

²⁴“‘Na, o Datù, ini sa selepangan sa nehauwan ko owoy ini ma sa ungayà i Datù Nemula mebaelan diyà keniko. ²⁵Mehemagawan ka kedu diyà sa medoo etaw, owoy mekeamut ka umugpà diyà sa medoo uled tanà. Mekekaen ka keluwen lagà sa sapi, owoy mepelê ka ma aglù. Amuk meelut sa pitu gepalay, metiigan ko dé sa egoh i Datù Nemula épê dakel egkegaga sa eg-ipat sa langun kedatuan sa etaw diyà tanà owoy megaga di humalì sa kedatuan diyà sa etaw egkeiyapan di kumedatù. ²⁶Migsugù ma sa egsugùsuguen i Nemula sa egoh di pandayaen sa tued di. Iya sa selepangan di mekepelikù doo diyà keniko sa kedatuan ko asal migtuu ka sa egoh i Datù Nemula épê dakel egkegaga sa egsabà sa langun. ²⁷Huenan di, o Datù, mepion hedem amuk sakemen ko dé sa igsasà ku diyà keniko. Sabuh ka dé bael salà owoy baeli ko polo sa mepion, owoy hiduwi ko ma sa medoo etaw egkepasangan. Amuk baelan ko iya wé, petow ki daa mekeuma taman melugay sa mepion keugpà ko.’”

Ini Sa Egoh Di Neketuu Sa Tegeinap I Nabokonosol

²⁸“Na, tigtu nebaelan langun ini i diyà si Datù Nabokonosol. ²⁹Hê, egoh di migtalà dé sepulù owoy duwa gebulan, egbigkatbigkat Datù Nabokonosol i diyà sa mepatag atep sa metolol dalesan di diyà Babiloniya. ³⁰Mig-ikagi, guwaen di, ‘Subela dé sa egkegaga diyà sa menuwa Babiloniya. Binaelan ku siini tigtu mepion ugpaan ku danà sa naken daa egkegaga owoy anì mebantug a ma.’

³¹“Hê, egoh di endà pelà egkeubus eg-ikagi, petow dé duen sa eg-ikagi kedu diyà langit, guwaen di, ‘O Datù Nabokonosol, dinegdineg ko ini i. Mekedan diyà keniko ini egoh di sa kedatuan ko. ³²Mehemagawan ka kedu diyà sa medoo etaw, owoy mekeamut ka umugpà diyà sa medoo uled tanà. Mekekaen ka keluwen lagà sa sapi. Agulé amuk meelut sa pitu gepalay, metiigan ko doo sa egoh i Datù Nemula épê dakel egkegaga sa eg-ipat sa langun kedatuan sa etaw diyà tanà owoy megaga di humalì sa kedatuan diyà sa etaw egkeiyapan di kumedatù.’

³³“Hê, petow dé neketuu iya wé nebaelan diyà si Datù Nabokonosol. Nehemagawan kedu diyà sa medoo etaw, owoy migkaen keluwen lagà sa sapi. Nepele aglù sa lawa di, owoy migketaes sa balut ulu di lagà sa bulbul banug, owoy lagà sulu sa manuk ketalunan sa sulu di.

³⁴“Na, egoh di neelut dé siedò pitu gepalay, aken i Nabokonosol, migsimbà a diyà si Nemula owoy nekepelikù sa mepion penemdem ku.

Huenan di, inolò ku Nemula i épê dakel egkegaga owoy inadatan ku owoy dinoyon ku sa Nemula melalù taman melugay. Mig-ikagi a, guwaen ku,

‘Endà duen ketamanan sa kedatuan di
owoy taman melugay sa egkegaga di.

³⁵ Diyà sa kehaa i Nemula, endà duen egkegaga sa langun etaw diyà siini sinukub langit,
owoy baelan di sumalà dé sa ungayà di diyà sa medoo
egsugùsuguen di diyà langit owoy diyà sa medoo etaw diyà tanà.

Endà duen sa mekehawid kenagdi owoy endà ma duen sa mekelegen.’

³⁶ “Hê, egoh di nekepelikù sa mepion penemdem ku, nekepelikù ma dé sa salag ku owoy sa kedatuan ku owoy sa egkegaga ku. Agulé neiyapan a dema sa medoo tapay salu ku owoy sa medoo tapay ulu-ulu ginela ku, owoy neumanan pa sa egkegaga ku diyà sa egoh muna. ³⁷Huenan di, ini egoh eg-oloen ku Datù i diyà langit owoy egpesalamat a ma diyà kenagdi, enù ka enget sa langun egbaelan di owoy metudà ma, owoy megaga di petukéy sa etaw egpedakeldakel.”

Ini Sa Egoh Sa Nepenalah Belad Migsulat Diyà Sa Kelatkat

5 ¹⁻³ Na, egoh di nelugaylugay, migkedatù Bêlsasal i diyà Babiloniya. Agulé sebaen sigep migbael dakel pista owoy igsasà di sa sengibu kaunutan diyà sa nesakupan kedatuan di. Ligò da eg-inem sa wain, igsugù di igpekuwa sa medoo tabù bulawan owoy tabù pilak sa tapay kinuwa sa emà di si Nabokonosol diyà sa Dalesan i Nemula dutu Hêlusalém dò egoh anay. Igpekuwa di iya wé enù ka iya sa kenà da uminem sa medoo kaunutan owoy sa medoo sawa di ma, owoy sa medoo bayi udipen sinawa di. Huenan di, egoh di nekeuma dé sa medoo tabù diyà kenagda, iya dé sa eg-ineman da. ⁴ Agulé ligò da eg-inem sa wain, eg-oloen da sa medoo inetaw egpenemulawen da binaelan da bulawan owoy pilak owoy tumbaga owoy putow owoy kayu owoy batu ma.

⁵ Hê, petow dé duen sa nepenalah belad egsulat diyà sa kelatkat medapag diyà sa taguan sulù diyà sa metolol dalesan sa datù. Hinaa sa datù sa kesulat di, ⁶ huenan di miglukub owoy migkelusék enù ka nelimedangan temù. ⁷ Agulé inumow di sa medoo épê lambus owoy sa medoo épê netiigan owoy sa medoo tegeantap. Egoh da migtebow diyà kenagdi, mig-ikagi diyà kenagda, guwaen di, “Sumalà dé sa mekebasa sa sulat diyà sa kelatkat owoy meketulon sa selepangan di, dumuen sa untung di sa kawal buhahaw lagà sa kawal datù owoy sa basak bulawan, owoy gelalen ku ma ketelu sa épê egkegaga diyà sa kedatuan ku.”

⁸ Hê, migpedapag sa langun etaw di épê netiigan anì basawen da siedò nekesulat diyà sa kelatkat. Dodoo endà egkebasa da duu owoy endà ma

egkeselepong da duu diyà kenagdi. ⁹Huenan di, tigtu nelimedangan Datù Bélsasal i, owoy neumanan sa egoh di migkelusék, owoy tigtu nebukul ma sa medoo kaunutan di.

¹⁰Agulé egoh sa booy^b migdineg sa kagikagi sa datù owoy sa medoo kaunutan, mig-awuh diyà sa bilik kenà da nesetipon, owoy mig-ikagi, guwaen di, “O Datù, ungayà ku kumelalù ka taman melugay. Yaka egkebukul la owoy yaka ma egkelusék ka. ¹¹Duen doo sa etaw diyà sa nesakupan kedatuan ko linuhub sa suguy sa medoo nemula metiengaw. Egoh i emà ko Nabokonosol pelà sa datù, duen sa netiigan siedò etaw lagà sa keketiig sa medoo nemula. Huenan di, kagdi sa ginelal sa emà ko kaunutan diyà sa medoo tegebael balitmata owoy sa medoo épê lambus owoy sa medoo épê netiigan owoy sa medoo tegeantap. ¹²Iya sa ngadan di si Daniyél dodoo pinengadanan da ma Béltésasal, enù ka melabel penemdem owoy épê netiigan. Metiig sumelepong sa tegeinap, owoy ingadanan di sa medoo nelidung selepangan owoy upionen di sa kelikutan. Huenan di, peangayi ko owoy peselepangi ko diyà kenagdi sa nekesulat diyà sa kelatkat.”

¹³Huenan di, igpeangay sa datù Daniyél i. Hê, egoh di migtebow, mig-ikagi sa datù, guwaen di, “Enù di ya, kuna si Daniyél sa nesigkem inuwit i emà ku Datù Nabokonosol kedu Huda dò? ¹⁴Dineg ku sa egoh di diyà keniko sa suguy sa medoo nemula owoy melabel ma sa penemdem ko owoy épê ka ma gaa netiigan. ¹⁵Igpeangay ku sa medoo épê netiigan lapeg sa medoo épê lambus anì ipebasa ku hedem diyà kenagda sa nekesulat diyà sa kelatkat owoy ipeselepong ku ma, dodoo endà negaga da duu. ¹⁶Dodoo netulonon a metiig ka gaa egselepong sa nelidung owoy upionen ko ma gaa sa kelikutan. Amuk mebasa ko siedò nekesulat owoy meselepong ko diyà kenak, pekawalen ku kuna sa kawal buhahaw lagà sa kawal datù owoy pebasaken ku ma kuna sa basak bulawan owoy gelalen ku ma kuna sa ketelu ulu-ulu diyà sa kedatuan ku.”

¹⁷Migsagbì Daniyél i, guwaen di, “O Datù, niko doo iya wé ibegay ko uloy, ataw ka mebaluy amuk ibegay ko diyà sa liyu etaw. Dodoo basawen ku doo diyà keniko siedò nekesulat diyà sa kelatkat owoy selepangan ku ma diyà keniko. ¹⁸O Datù, si Datù Nemula épê dakel egkegaga sa migpedatù sa emà ko si Nabokonosol egoh anay. Egoh di datù, tigtu dakel sa egkegaga di owoy eg-adatan ma sa medoo etaw. ¹⁹Danà sa egkegaga di igbegay i Nemula, huenan di egkelimedangan sa langun balangan etaw diyà kenagdi, muni dé sa tanà keduwan da ataw ka sa balangan kagi da. Mebaluy ipeimatay di sa etaw amuk ungayà di imatayan, owoy mebaluy ma endà ipeimatay di duu amuk ungayà di endà mematay.

^b 5:10 Siini booy, mebaluy kagdi sa sawa i Nabokonosol ataw ka sa anak i Nabokonosol sa sinawa i Bélsasal.

Megaga di pedakel sa etaw amuk ungayà di kumedakel, owoy megaga di ma petukééy sa etaw amuk ungayà di petukééyen. ²⁰Dodoo danà di migpedakeldakel owoy migketegas sa ulu di, huenan di minekedan sa kedatuan di owoy sa egkegaga di ma. ²¹Nehemagawan kedu diyà sa medoo etaw, owoy nekeiling penemdem sa medoo uled tanà. Nekeamut eg-ugpà diyà sa medoo melayal asnu, owoy nekekaen ma keluwen lagà sa sapì owoy nepelê aglù sa lawa di. Iya sa nebaelan di taman sa egoh di neketiig si Datù Nemula épê dakel egkegaga sa eg-ipat sa langun kedatuan sa etaw diyà tanà owoy megaga di humalì sa kedatuan diyà sa etaw egkeiyapan di kumedatù.

²²“Dodoo kuna sa anak di, o Bélsasal. Apiya di pa netiigan ko langun iya wé, tapay ka doo endà egpetukééy diyà sa kehaa i Nemula. ²³Dodoo iya polo sa penemdem ko miglowon ka pa kéen si Nemula diyà langit. Igpeangay ko sa medoo ineman kedu diyà sa Dalesan i Nemula, owoy iya sa inineman yu lapeg sa medoo kaunutan ko owoy sa medoo sawa ko owoy sa medoo bayi udipen sinawa ko. Egpemulawen ko ma sa medoo inetaw binaelan bulawan owoy pilak owoy tumbaga owoy putow owoy kayu owoy batu, sa medoo nemula-mula endà eg-ilag da owoy endà ma egdineg da owoy endà ma egpeketiig da. Dodoo endà eg-adatan ko duu sa tigtu Nemula egsabà sa hagtay ko owoy sa egtulik sa langun egbaelan ko. ²⁴Huenan di, pineangay di siedò nepenalah belad anì isulat di ini i medoo kagi.

²⁵“Ini sa kagi nekesulat, guwaen di, Méné, Méné, Tékél, Palsin. ²⁶Na sa kagi Méné, iya sa selepangan di binilang i Nemula sa lugay ko migkedatù, owoy neelut dé. ²⁷Hê, sa kagi Tékél, iya sa selepangan di tinimbang i Nemula kuna owoy kulang sa egkegaga ko kumedatù. ²⁸Owoy sa kagi Palsin, iya sa selepangan di mebaed sa kedatuan ko owoy mekebegay diyà sa medoo tegeMidiya owoy tegePélsiya.”

²⁹Agulé danà sa igsugù i Bélsasal, pinekawal da Daniyel i sa kawal buhahaw lagà sa kawal datù owoy pinebasak da sa basak bulawan, owoy ginelal di ma kagdi sa ketelu ulu-ulu diyà sa kedatuan di. ³⁰Hê, egoh iya ma dé sigep, neimatayan Bélsasal i sa datù diyà sa tanà Babiloniya. ³¹Agulé si Daliyu tegeMidiya sa neketuhì migkedatù egoh di enem pulù owoy duwa gepalay dé sa kelukes di.

Ini Sa Egoh I Daniyel Ninabù Da Diyà Sa Lugenan Liyun

6 ¹Na, sebaen agdaw miggelal Datù Daliyu i sa magatus duwa pulù kedoo kaunutan diyà sa nesakupan kedatuan di. ²Hinemilì di ma Daniyel i owoy sa duwa дума di anì kagda sa tigtu ulu-ulu diyà siini medoo kaunutan. Iya sa binaelan di anì endà melikutan di eg-ipat sa kedatuan di. ³Na, uman pa mepion sa binaelan i Daniyel diyà sa kebael sa дума di ulu-ulu lapeg sa langun kaunutan. Huenan di, egpenemdemen

sa datù si Daniyél sa peulu-uluwen di diyà sa nesakupan sa kedatuan di. ⁴Dodoo sa duwa дума di ulu-ulu owoy sa medoo kaunutan, epgengauwen da sa kenà di mekeamu sa keuwit i Daniyél anì dumuen sa meketipu da kenagdi. Dodoo endà duen sa eghauwen da kenà di egpekeamu sa itipu da hedem diyà kenagdi, enù ka tigtu kesaligan polo owoy mepion ma sa keuwit di. ⁵Huenan di, egseikagiyay da, guwaen da, “Endà duen sa itipu ta kenagdi, liyu daa amuk mekesekê diyà sa uledin sa hagdi egpenemulawen.”

⁶Huenan di, mig-angay da langun diyà si Datù Daliyu owoy mig-ikagi da, guwaen da, “O Datù, ungayà ké kumelalù ka taman melugay. ⁷Kami sa medoo kaunutan owoy sa medoo ulu-ulu owoy sa medoo liyu ginela ko diyà sa nesakupan sa kedatuan ko. Neseunut sa egpegeniyen ké diyà keniko anì baelan ko sa uledin tigtu mepangunutan. Edung ini egoh di taman telu pulù agdaw, endà duen sa nemula ataw ka sa etaw kenà sumimbà liyu daa diyà keniko. Amuk duen etaw tumipay siini uledin, nabuen diyà sa lugenan liyun. ⁸Huenan di, o Datù, baeli ko siini uledin. Pesulati ko owoy pilmawi ko dé anì endà mebaluy di mepelumanan ataw ka mekedan, iling sa medoo uledin ta diyà sa tanà Midiya owoy tanà Pélsiya.” ⁹Hê, binaelan i Datù Daliyu iya wé uledin owoy pinilmawan di.

¹⁰Na, egoh i Daniyél neketiig sa egoh sa datù migpilma sa uledin, hê miglikù diyà sa kenà di owoy miggemow diyà sa bilik di diatas atung kenà di egsimbà diyà sa selatal tatawan nekeisalu diyà Hêlusalém. Dahiya sa kenà di egligkued egsimbà diyà si Nemula. Telu gulê uman agdaw sa kesimbà di epgesalamat diyà si Nemula enù ka iya sa egbaelan di takà.

¹¹Dodoo egtulikan mabes sa medoo kuntelà di Daniyél i owoy hinaa da kagdi migsimbà diyà si Nemula. ¹²Huenan di, migpelikù da diyà sa datù anì tulonen da sa egoh i Daniyél migtipay diyà sa uledin. Mig-ikagi da, guwaen da, “O Datù, pinilmawan ko atu sa uledin ta edung ini egoh di taman telu pulù agdaw, endà duen sa nemula ataw ka sa etaw kenà sumimbà liyu daa diyà keniko? Amuk duen etaw tumipay diyà siini uledin, nabuen diyà sa lugenan liyun.”

Migsagbi sa datù, guwaen di, “Tuu iya wé uledin, owoy endà dé mebaluy di mepelumanan, iling sa medoo uledin ta diyà sa tanà Midiya owoy tanà Pélsiya.”

¹³Agulé mig-ikagi da diyà sa datù, guwaen da, “Na si Daniyél sa nesigkem kedu diyà sa tanà Huda, endà eg-adat di keniko, o Datù. Endà ma epgangunut di diyà sa uledin binaelan ko, enù ka egsimbà polo diyà sa Nemula di telu gulê uman agdaw.”

¹⁴Hê, nebukul temù sa pedu sa datù egoh di migdineg iya wé. Iya sa ungayà di tabangan di hedem Daniyél i. Huenan di, nehapunan sa lugay di egpenemdem sa ukit di umaluk kenagdi. ¹⁵Na, egoh di mahapun dé,

migpelikù dema sa medoo etaw ginela sa datù owoy mig-ikagi da diyà kenagdi, guwaen da, “O Datù, netiigan ko duen sa uledin sa medoo tegeMidiya owoy tegePélsiya endà mebaluy di mepelumanan sa uledin amuk pinilmawan dé sa datù.”

¹⁶Hê, igsugù sa datù igpesigkem Daniyel i owoy igpenabù di diyà sa lugenan liyun. Dodoo mig-ikagi sa datù diyà si Daniyel, guwaen di, “Mepion hedem amuk mealukan ka sa Nemula takaan ko eggangunutan.”

¹⁷Agulé sinagpeng da sa dakel batu sa tosong lugenan kenà da mignabù si Daniyel, owoy tinandaan sa datù sa laned tising di owoy sa laned tising ma sa medoo kaunutan ginela di anì endà mealukan di sa liyu etaw Daniyel i. ¹⁸Na, egoh i Datù Daliyu miglikù diyà sa metolol dalesan di, neelut sigep endà neketudug di. Endà ma migkaen di owoy endà ma migpegeni di sa medoo keselapanan.

¹⁹Hê, egoh di egkawatkawat pelà sa kesimag di, mig-enaw sa datù owoy migpetéél eg-angay diyà sa lugenan liyun. ²⁰Egoh di migtebow, egkebukul eg-umow, guwaen di, “O Daniyel sa egsugùsuguen sa Nemula melalù, nealukan ka pa sa Nemula takaan ko eggangunutan kedu diyà sa medoo liyun?”

²¹Migsagbì Daniyel i, guwaen di, “O Datù, ungayà ku kumelalù ka taman melugay. ²²Duen sa egsugùsuguen i Nemula pineangay sa Nemula ku anì pungenen di sa ebà sa medoo liyun anì endà medaetan a. Binaelan i Nemula iya wé enù ka netiigan di metiengaw sa egbaelan ku owoy endà ma migtipay a diyà keniko, o Datù.”

²³Hê, egoh sa datù migdineg iya wé, tigtu neanggan owoy igsugù di igpebatun Daniyel i kedu dalem sa lugenan liyun. Egoh di nekelaun dé, endà duen sa hinaa da palì diyà sa lawa di apiya tukééy daa, enù ka tigtu migsalig diyà si Nemula. ²⁴Agulé igsugù i Datù Daliyu igpenabù sa langun migtipu si Daniyel diyà sa lugenan liyun, lapeg sa medoo sawa da owoy sa medoo anak da ma. Hê, egoh da endà pelà neketenà dalem, egsepekawan da dé sa medoo liyun.

²⁵Agulé migsulat Datù Daliyu i diyà sa langun balangan etaw diyà sa medoo balangan tanà owoy diyà sa medoo balangan kagi etaw diyà siini sinukub langit. Ini sa kagi di nekesulat, guwaen di, “Ungayà ku kumetanà sa keugpà yu. ²⁶Ini sa isugù ku diyà sa langun etaw nesakupan sa kedatuan ku. Kelimedangi yu sa Nemula i Daniyel owoy pangunuti yu ma.

Enù ka kagdi sa Nemula melalù owoy endà duen taman sa lalù di.

Endà duen taman sa kedatuan di owoy endà ma mekedan sa egkegaga di.

²⁷Kagdi sa eg-aluk sa medoo etaw di owoy sa eglau kenagda diyà sa kenà da egkeudipen.

Kagdi sa egbael sa medoo panduan owoy sa medoo egkegaipan etaw dutu langit dò owoy diyà siini tanà.

Kagdi sa mig-aluk si Daniyél anì endà mekaen di liyun.”

²⁸Na, tigtu migkepion sa keugpà i Daniyél sa lugay i Daliyu pelà migkedatù owoy sa lugay i Silo tegePélsiya ma migkedatù.

INI DENU SA MEDOO NEHAUWAN I DANİYÉL (7:1–12:13)

Ini Sa Tegeinep I Daniyél Denu Sa Epat Uled Tanà

7 ¹Na, egoh sa muna palay egoh i Bélsasal migkedatù diyà sa tanà Babiloniya, migtegeinep Daniyél i owoy duen sa nehauwan di ligò di eghibat diyà sa kateli di. Ini sa tegeinep di igsulat di, ²guwaen di, “Sebaen sigep duen sa nehauwan ku. Hinaa ku sa dakel dagat egkesetugdaan sa epat meleges kelamag owoy egbakat sa dagat. ³Hê, petow dé duen sa epat dakel uled tanà migpegaun kedu diyà dagat owoy nesetigesa sa palas da.

⁴“Na, éhê palas liyun sa muna uled tanà, dodoo duen sa pakpak di éhê palas banug. Egoh ku eghahaa, nepesuk sa pakpak di. Nehenat sa lawa di owoy mineketigdeg éhê palas etaw, owoy nebegayan ma penemdem lagà sa penemdem etaw.

⁵“Na, sa keduwa uled tanà, éhê palas oso. Migtudoy owoy duen sa binangà di telu gusuk. Hê, duen sa eg-ikagi diyà kenagdi, guwaen di, ‘Daesi ko dé sa medoo ekud da taman sa egoh ko tumakas.’

⁶“Agulé hinaa ku sa ketelu di uled tanà éhê palas liyopaldo. Dodoo duen sa epat pakpak di diyà sa iyug di, owoy epat ma sa ulu di owoy nebegayan ma egkegaga anì kumematù.

⁷“Agulé egoh di neubus iya wé, hinaa ku sa keepat di uled tanà. Tigtu mekepesu eghahauwen owoy tigtu mebagel ma. Putow sa medoo dakel ngipen di, huenan di tekeben di daa amuk duen sa egkekuwa di, owoy utuhan di sa nesamà di. Tigesa sa palas di diyà sa liyu telu uled tanà enù ka duen sa sepulù sidung di. ⁸Egoh ku eghahaa sa medoo sidung di, duen sa sebaen tukééy sidung di egtunas owoy nebadut sa telu tapay sidung di anì dumuen sa elet di. Épê medoo mata siini sidung lagà mata etaw, owoy duen ma sa ebà di takà eg-ikagi eppedakeldakel.”

Ini Sa Nehauwan Denu Sa Etaw Melalù Taman Melugay

⁹Agulé egoh ku eghahaa, duen sa medoo metolol bangkù igtenà. Migugsad diyà sa sebaen metolol bangkù sa etaw épê lalù taman melugay. Mekesilang sa ginis di owoy sa balut ulu di danà di tigtu mebulà. Éhê eglegleg sa bangkù di, owoy hediya ma éhê eglegleg sa medoo nelibol lisen sa bangkù di. ¹⁰Nekeiling kedelug wayeg sa legleg apuy kedu diyà sa metolol bangkù di. Ngibu-ngibuwan sa egsugùsuguen di egbael sa langun ungayà di, owoy lagsàlagsaan sa etaw migtigdeg diyà sa taengan di. Hê, umedung dé kumukum, huenan di binekah di sa medoo libelu.

¹¹Na, ligò ku eg-uman eg-inengteng, egdinegen ku sa kepeolòlò siedò tukéey sidung sa keepat uled tanà. Inuman ku eghahaa taman sa egoh di neimatayan sa keepat uled tanà, owoy nedaetan sa lawa di danà di nekedugsù diyà sa apuy. ¹²Na, sa liyu telu uled tanà, nekedan dé sa egkegaga da dodoo nehagtay da pelawà, dodoo endà dé iseg di melugay sa hagtay da.

¹³Agulé ligò ku eg-uman eghahaa sa nehauwan ku egoh iya wé sigep, hinaa ku sa éhê palas etaw migpeunut diyà gaeb eg-angay egdapag diyà siedò etaw épê lalù taman melugay. ¹⁴Kagdi sa binegayan egkegaga owoy lalag owoy kedatuan, anì kagdi sa pangunutan sa langun etaw diyà sa medoo balangan tanà owoy sa langun balangan kagi etaw. Endà duen ketamanan sa egkegaga di, owoy endà ma medaetan sa kedatuan di.

Ini Sa Selepangan Sa Tegeinép I Daniyé

¹⁵Na, aken si Daniyé, nebogo a owoy nelimedangan a danà iya wé medoo nehauwan ku. ¹⁶Huenan di, migpedapag a diyà sa sebaen etaw migtigdeg dahiya, owoy mig-igsà a diyà kenagdi denu sa selepangan sa nehauwan ku. Agulé sinele pang di diyà kenak, ¹⁷guwaen di, “Sa epat dakel uled tanà, iya sa epat kumedatù diyà siini uwang tanà. ¹⁸Dodoo sa medoo etaw i Datù Nemula sa Nemula épê dakel egkegaga, mebegayan da doo sa kedatuan owoy mehagda ma taman melugay.”

¹⁹Agulé mig-uman a eg-igsà denu sa selepangan sa keepat uled tanà sa tigesas palas diyà sa liyu owoy tigtu mekepesu eghahauwen. Amuk duen sa egkekuwa di, tekeben di daa danà sa ngipen di putow owoy danà ma sa sulu di tumbaga, agulé utuhan di daen sa nesamà di. ²⁰Inigsà ku ma sa selepangan sa sepulù sidung di owoy sa sebaen hudihudi migtunas sidung di owoy sa telu nebadut tapay sidung di. Épê mata iya wé sidung di owoy duen ma sa ebà di takà eg-ikagi egpeolòlò. Iya sa palas di uman pa mebagel iya wé sidung diyà sa medoo liyu sidung di. ²¹Egoh ku eghahaa, eggilawen iya wé sidung sa medoo etaw metiengaw diyà sa kehaa i Nemula, owoy uyayaan sa sidung kagda. ²²Agulé hinaa ku siedò etaw épê lalù taman melugay mig-angay egtampil diyà sa medoo etaw i Datù Nemula, enù ka neuma dé sa agdaw sa egoh da mebegayan egkegaga anì kumedatù da.

²³Na, ini sa kesele pang di diyà kenak. Guwaen di, “Sa keepat uled tanà, iya sa keepat kedatuan kumedatù diyà siini uwang tanà owoy tigesas diyà sa langun liyu kedatuan. Lagà tekeben di daa sa langun kedatuan owoy utuhan di ma. ²⁴Na, sa sepulù sidung di, iya lagà sa sepulù datù kumedatù diyà sa kedatuan di. Agulé lumesut sa sebaen ma pedatù owoy tigesas sa hagdi adat diyà sa kedoo da. Kagdi sa petuhì enù ka tabanan di sa telu datù. ²⁵Anan meketabiyà diyà si Datù Nemula sa medoo ikagiyen di, owoy pelihayen di ma sa medoo etaw i Nemula. Ungayà di mesambian

sa adat kesimbà da owoy sa medoo uledin denu sa kesimbà da, owoy sakupen di sa hagdi kedatuan sa medoo etaw i Nemula taman telu gepalay owoy tengà.

²⁶“Dodoo amuk meuma sa kekukum i Nemula, mekedan sa egkegaga iya wé datù owoy tigtu medaetan ma sa kedatuan di. ²⁷Agulé sa egkegaga owoy sa lalag sa langun kedatuan diyà siini sinukub langit, mekebegay doo diyà sa medoo etaw i Nemula, sa Nemula épê dakel egkegaga. Endà duen ketamanan sa kedatuan di, owoy mekepangunut ma diyà kenagdi sa langun datù diyà siini uwang tanà.”

²⁸Na, iya taman sa nehauwan ku. Tigtu a migpesu owoy migkelusék a ma, dodoo igtagù ku daa iya wé diyà sa pedu ku.

Ini Sa Nehauwan I Daniyél Denu Sa Kebilibili Owoy Kambing

8 ¹Na, egoh sa ketelu di gepalay sa lugay i Bélsasal migkedatù, duen dema sa nehauwan ku. ²Ini sa nehauwan ku. Egtigdeg a gaa diyà sa keba sa lawa't wayeg Ulay diyà sa menuwa Susa. Neulingutan kutà iya wé menuwa owoy nesakupan sa pelubinsiya Ilam.

³Hê, hinaa ku sa mandangan kebibili épê duwa metaes sidung egtigdeg diyà sa keba't wayeg. Uman pa metaes sa sidung di hudihudi migtunas diyà sa muna. ⁴Egoh ku mighaa duu, takà egsidung sa kebibili anì kedanan di sa langun egtigdeg denu eledan agdaw owoy denu belabagan owoy denu kimataan. Endà duen liyu uled tanà mekegaga diyà kenagdi, owoy endà ma duen sa mekegaga umaluk kenagda diyà sa egbaelan di. Huenan di, egbaelan di sumalà dé sa ungayà di owoy kumedakel ma sa egkegaga di.

⁵Ligò ku eg-inengteng duu, petow dé duen sa mandangan kambing migtebow kedu diyà eledan agdaw. Egkambang diyà awang dodoo endà eg-utuh di diyà tanà egoh di eg-ipanaw. Duen sa sebaen dakel sidung di diyà sa elet mata di. ⁶Migpedapag diyà sa mandangan kebibili épê duwa sidung sa hinaa ku diyà sa keba't wayeg. Hê, ginebek di danà sa kebulit di. ⁷Hinaa ku sa egoh di egdagseg, eg-iliden di sa kebibili danà di tigtu egkelangget. Hê, sinidung di, agulé netepù sa duwa sidung sa kebibili. Endà nekeatu sa kebibili diyà sa kambing, huenan di nekehibat diyà tanà owoy takaan di eg-utuhan. Endà ma duen sa mekealuk kenagdi.

⁸Agulé kumedakel pa uman sa egkegaga sa kambing. Dodoo egoh di migkedakel dé sa egkegaga di, netepù sa sidung di owoy dumuen sa mekesambì tumunas epat sidung di. Mig-isalu sa sebaen sidung di denu belabagan, owoy mig-isalu sa sebaen denu kimataan, owoy mig-isalu sa sebaen denu tebowon agdaw, owoy mig-isalu sa sebaen denu eledan. ⁹Diyà siini epat sidung di, duen sa sebaen migsagpak taman sa egoh di tigtu migkedakel. Migkedakel sa egkegaga di taman sa egoh di nesakupan di sa tanà denu belabagan owoy sa tanà denu tebowon owoy

sa tanà igpasad i Nemula. ¹⁰Uman pa miglenuk sa egkegaga di taman nekesekuk diyà langit. Huenan di, eggilawen di sa medoo éhê bituen diyà langit sa medoo etaw i Nemula. Agulé egnabuen di diyà tanà sa duma bituen owoy egkogkogon di ma. ¹¹Danà di egpedakeldakel, huenan di egkelukuyan di eg-atuwan sa kaunutan sa medoo egsugùsuguen i Nemula diyà langit. Hinawidan di sa uman agdaw kebegay etaw diyà si Nemula, owoy pinedaetan di ma sa Dalesan i Nemula. ¹²Huenan di, nekesalà sa medoo etaw enù ka migsabuh da egbegay sa uman agdaw kebegay diyà si Nemula owoy nekedan ma sa tuu kesimbà. Hê, egkekuwa sa sidung migsagpak sa langun ungayà di.

¹³Agulé dinineg ku sa duwa egsugùsuguen i Nemula egseolomoy da. Mig-igsà sa sebaen, guwaen di, “Ngadan taman sa lugay di ini i medoo egkebaelan? Nengan sa taman di mehawidan sa uman agdaw kebegay etaw diyà si Nemula? Ngadan sa taman di pandayaen pedatù sa medaet? Owoy ngadan sa taman di mesadsadan sa Dalesan i Nemula owoy sa medoo etaw épê egkegaga diyà langit?”

¹⁴Agulé migsagbì sa keduwa egsugùsuguen i Nemula, guwaen di, “Sengibu magatus lima pulù agdaw sa lugay di. Hê, amuk meubus iya wé, mekepelikù dé sa tapay ukít kesimbà diyà sa Dalesan i Nemula.”

Ini Sa Egoh I Gabiyél Migselepag Sa Nehauwan I Daniyél

¹⁵Na, aken si Daniyél mighaa sa nehauwan. Ligò ku egpenmdem denu sa selepangan di, petow dé duen sa éhê palas etaw migtigdeg diyà sa taengan ku. ¹⁶Agulé duen sa dinineg ku kagi't etaw kedu diyà sa lawa't wayeg Ulay. Mig-ikagi, guwaen di, “O Gabiyél, tulon ko diyà kenagdi sa selepangan sa nehauwan di.”

¹⁷Hê, egoh i Gabiyél migpedapag diyà kenak, miglagkeb a diyà tanà danà ku tigtu nelimedangan. Dodoo mig-ikagi diyà kenak, guwaen di, “Kuna sa etaw daa diyà tanà, dodoo mepion amuk metiigan ko sa selepangan sa nehauwan ko denu sa mebaelan amuk meuma sa sabuhanan agdaw.”

¹⁸Ligò di eg-ikagi diyà kenak, nekedan a tuleng owoy nekelagkeb a diyà tanà. Dodoo sinabaan di aken anì meketigdeg a. ¹⁹Agulé mig-ikagi diyà kenak, guwaen di, “Tulonon ku kuna sa mebaelan amuk meuma sa kebulit i Nemula. Sa nehauwan ko, iya denu sa mebaelan amuk meuma sa sabuhanan agdaw. ²⁰Iya sa selepangan sa kebilibili épê duwa sidung sa duwa datù diyà sa tanà Midiya owoy tanà Pélsiya. ²¹Na sa kambing, iya lagà sa kedatuan diyà tanà Gelisiya. Owoy sa dakel sidung di diyà sa elet mata di, iya sa muna migpedatù diyà tanà Gelisiya. ²²Hê, sa epat sidung di migtunas egoh sa sebaen netepù, iya sa epat kumematù amuk mebaed epat baed sa uwang tanà Gelisiya. Pedatù da dodoo endà meketepeng sa egkegaga da diyà sa egkegaga sa muna datù.

²³“Agulé egoh di buyu dé meelut sa kedatuan da owoy sa egoh da egtemù dé egbael salà, dumuen dema sa sebaen pedatù tigtu mebalaw owoy tegeakal ma. ²⁴Tigtu kumebagel, dodoo beken danà daa sa hagdi egkegaga. Medoo sa medaet baelan di megaipan etaw owoy meketuu ma sa langun ungayà di. Atuwani di sa medoo ulu-ulu épê egkegaga lapeg sa medoo etaw metiengaw diyà sa kehaa i Nemula. ²⁵Temuen di sa keakal di, huenan di atuwani di sa medoo etaw, agulé petow dé imatayan di kagda. Pedakelen di ma kagdi, huenan di gilawen di doo sa Datù diyà sa langun datù. Dodoo mepigtamayan doo, beken duu danà etaw.

²⁶“O Daniyél, tuu sa nehauwan ko denu sa egoh di mehawidan sa kebegay etaw diyà si Nemula amuk magtu simag owoy amuk mahapun. Dodoo yaka pelawà egtulon duu enù ka melugay pa meketuu iya wé.”

²⁷Na, aken si Daniyél, nekedian a bagel owoy nelugaylugay a eglinadu. Agulé egoh ku nelikuan, mig-enaw a owoy migpelikù a diyà sa galebek igsugù sa datù diyà kenak. Dodoo tapay a doo egkebukul danà sa nehauwan ku, enù ka melikut sa selepangan di.

Ini Sa Egeh I Daniyél Migsimbà Denu Sa Medoo TegeIslaél

9 ¹Na, egoh di nelugaylugay dé, migkedatù Daliyu i anak i Asuliyu tegeMidiya diyà sa uwang tanà Babiloniya. ²Egoh sa muna palay di migkedatù, egbasawen ku sa nekesulat sa medoo tegesugkow kagi i Nemula, owoy egpenemdemen ku ma sa egoh di pitu pulù gepalay sa lugay di medaetan sa menuwa Héluasalém, enù ka iya sa inikagi i Datù Nemula diyà si Hilimiyas sa tegesugkow sa kagi di.^c ³Huenan di, tigtu a egsimbà diyà si Datù Nemula owoy egpehiduhidu a diyà kenagdi. Egpeulanen ku sa kekaen ku owoy egkawal a ma sa binekas sakù owoy egbuhuhan ku ma abuh sa ulu ku.

⁴Egsimbà a diyà si Datù Nemula, sa Nemula ku, owoy egtulonon ku ma sa medoo salà ké. Guwaen ku, “O Datù Nemula, dakel sa egkegaga ko owoy meadatan ka. Ipetuu ko sa pasad ko humidu diyà sa medoo etaw épê kehidu diyà keniko owoy sa egpangunut diyà sa igsugù ko. ⁵Dodoo nesalà ké diyà keniko, owoy medaet sa binaelan ké diyà sa kehaa ko. Migsekê ké diyà sa ungayà ko owoy pineulan ké ma sa medoo igsugù ko. ⁶Endà migdinegdineg ké diyà sa medoo tegesugkow kagi ko sa migpetumàmà diyà sa medoo datù ké owoy diyà sa medoo ulu-ulu ké owoy diyà sa medoo tupù ké owoy diyà sa langun kedoo ké ma.

⁷“O Datù Nemula, anan metudà sa egbaelan ko. Dodoo kami, egkemalaan ké danà di medaet sa egbaelan ké. Hediya ma sa egbaelan sa medoo tegeHuda owoy tegeHéluasalém owoy sa langun tegeIslaél lapeg

^c 9:2 Basa ko Hilimiyas 25:11; owoy 29:10 denu sa pitu pulù gepalay sa lugay di medaetan sa menuwa Héluasalém

sa medoo etaw sinepalak ko iling ka medapag ataw ka mediyù, enù ka anan ké migtipay diyà keniko. ⁸O Datù Nemula, egkemalaan ké lapeg sa medoo datù ké owoy sa medoo ulu-ulu ké owoy sa medoo tupù ké ma, enù ka anan ké nesalà diyà keniko. ⁹Dodoo kuna, o Datù Nemula, tapay ka doo mehidu owoy tegepeuloy ka ma salà, apiya di pa linampang ké kuna. ¹⁰Endà migpangunut ké diyà keniko danà ké endà migpigtuu sa medoo igsugù ko diyà kenami pineukit ko diyà sa medoo tegesugkow sa kagi ko. ¹¹Migtipay sa langun tegeIslaél diyà sa uledin ko owoy ininiyugan da ma, owoy eg-eked da egpangunut diyà sa inikagi ko.

“Na, danà ké migbael salà, huenan di nekeuma dé diyà kenami sa kepigtamay ko nekesulat diyà sa uledin igsugkow i Mosis sa egsugùsuguen ko egoh anay. ¹²Igpetuu ko dé sa inikagi ko denu kenami owoy denu sa medoo ulu-ulu ké danà ko migpigtamay kenami. Huenan di, endà duen sa mebaelan diyà siini uwang tanà nekeiling sa nebaelan diyà sa menuwa HéIusalém. ¹³Neketuu dé ini i langun kepigtamay ko diyà kenami iling sa nekesulat diyà sa uledin igsugkow i Mosis egoh anay. Dodoo tapay ké doo endà egpehiduhidu diyà keniko, o Datù Nemula, enù ka endà eg-iniyugan ké duu sa medoo salà ké owoy endà ma egsagipaen ké duu sa tuu kagi ko. ¹⁴Huenan di, endà inéngén ko duu sa kepigtamay ko kenami, enù ka anan metudà sa langun egbaelan ko, dodoo migsekê ké polo diyà keniko.

¹⁵“O Datù Nemula, sa Nemula ké, miglalag ka taman ini egoh di danà ko migpehaa sa dakel egkegaga ko egoh ko mig-aluk sa medoo etaw ko kedu diyà sa tanà Igiptu egoh anay. Dodoo nesalà ké polo diyà keniko, owoy anan medaet sa egbaelan ké. ¹⁶O Datù Nemula, danà sa mepion ketabang ko kenami egoh anay, huenan di egpegeni a sabuhi ko dé sa kebulit ko diyà sa menuwa HéIusalém, enù ka iya sa menuwa eghiduwan ko dutu siedò getan hinemilì ko. Dodoo sa medoo etaw nekelibet diyà kenami, egpeumàumaan da kami i etaw ko owoy sa menuwa HéIusalém danà sa medoo salà ké owoy sa salà sa medoo tupù ké ma.

¹⁷“O Nemula ké, dinegdineg ko sa kesimbà ku, aken i egsugùsuguen ko, owoy sagipà ko sa kepegeni ku. Baeli ko dema sa dalesan ko nelukat anì metiigan sa langun etaw kuna sa tigtu Nemula. ¹⁸O Nemula, dinegdineg ko sa kesimbà ké. Hahaa ko sa kelikutan ké owoy sa egoh di nedaetan sa menuwa ko kenà etaw egpeketiig keniko. Endà egpegeni ké diyà keniko amuk danà di metudà sa egbaelan ké, dodoo danà di polo tigtu ka mehidu. ¹⁹O Datù Nemula, dinegdineg ko kami owoy peuloyi ko ma kami. O Nemula ku, yaka dé eg-éngén duu sa ketabang ko kenami anì metiigan sa langun etaw kuna sa tigtu Nemula, enù ka niko siini menuwa owoy sa medoo tegeIslaél ma.”

Ini Selepangan Sa Pitu Pulù Tigpituway Gepalay

²⁰Na, mig-uman a egsimbà diyà si Datù Nemula sa Nemula ku, owoy egtulon a ma sa medoo salà ku owoy sa medoo salà sa medoo duma ku

tegeIslaél. Egpehiduhidu a diyà kenagdi anì mebaelan dulì sa dalesan di diyà sa getan hinemilì di.^d ²¹Hê, egoh ku egsimbà, petow dé hinaa ku Gabiyél i sa hinaa ku diyà sa nehauwan ku egoh muna. Egpetéél eglepal eg-angay diyà kenak sa egoh selengan kebegay diyà si Nemula amuk mahapun. ²²Mig-ikagi diyà kenak, guwaen di, “O Daniyel, mig-angay a dini anì tabangan ku kuna petiig sa nehauwan ko. ²³Tigtu eghiduwani Nemula kuna, huenan di egoh ko mig-edung pelà egsimbà, sinagbian di kuna owoy pineangay di aken dini anì tulonen ku sa sagbì di diyà keniko. Na, dinegdineg ka anì metiigan ko sa selepangan sa nehauwan ko.

²⁴“Na, igpasad i Nemula epat gatus siyow pulù gepalay sa lugay kelikutan sa medoo duma ko owoy sa mapulù menuwa ko anì sumabuh da tumipay diyà kenagdi owoy anì endà muman da mael salà. Agulé metigtuwani sa salà da owoy mebaelan da dema sa metudà adat i Nemula. Amuk hediya, meketuu sa nehauwan owoy sa kagi sa medoo tegesugkow kagi i Nemula owoy ipeépê da dema diyà si Nemula sa mapulù Dalesan di. ²⁵Huenan di, dinegdineg ka anì metiigan ko ini i. Dumuen sa epat pulù siyow gepalay owoy sa epat gatus telu pulù owoy epat gepalay tumalà edung sa egoh di igbegay sa uledin anì mebaelan dulì sa menuwa Héluasalém taman sa egoh di tumbow sa datù hinemilì i Nemula. Mebaelan doo dulì sa menuwa Héluasalém owoy dumuen sa medoo kalasada di owoy sa kutà di ma, dodoo tigtu mekebogo iya wé gai. ²⁶Aglulé amuk meelut dé sa epat gatus telu pulù owoy epat gepalay, meimatayan sa mapulù datù hinemilì i Nemula, apiya di pa endà duen sa salà di. Agulé tumbow dema sa sebaen ma datù owoy pedaetan sa medoo sundalu di sa menuwa lapeg sa Dalesan i Nemula. Hê, tumbow sa sabuhanan agdaw lagà sa memahà egdugsuk. Amuk hediya, dumuen sa kesegilaway owoy sa medoo kelikutan enù ka iya sa tinapay i Nemula taman meuma sa sabuhanan agdaw. ²⁷Na, baelan siedò datù sa megamel kesepasaday diyà sa medoo etaw taman pitu gepalay. Dodoo amuk tumalà dé sa telu gepalay owoy tengà, hawidan di sa kebegay sa medoo etaw diyà si Nemula. Owoy beken iya daa, dodoo itenà di polo sa inetaw tigtu medaet diyà sa Dalesan i Nemula anì medaetan sa kepigtuu sa medoo etaw. Iya sa baelan di taman endà pelawà meuma sa kepigtamay i Nemula diyà kenagdi.”

Ini Sa Nehauwan I Daniyel Diyà Sa Keba't Wayeg Tigelis

10 ¹Na, egoh di telu dé gepalay sa lugay i Silo migkedatù diyà sa tanà Pélsiya, duen sa nehauwan i Daniyel sa pinengadanan da ma Béltésasal. Tigtu tuu iya wé nehauwan di denu sa dakel kesegilaway tumbow. Netiigan di selepangan sa nehauwan di enù ka neselepang diyà kenagdi pineukit diyà sa sebaen ma nehauwan di.

^d 9:20 Iya sa getan hinemilì i Nemula sa menuwa Héluasalém.

²Na aken si Daniyé1, telu kapadian sa lugay ku nebukul egoh iya. ³Iya ma sa lugay ku endà migkaen a sa kalni ataw ka sa mepion mekaen, owoy endà mig-inem a sa wain owoy endà ma iglulow ku duu sa lana ipepion ngadeg.

⁴Hê, egoh sa keduwa di pulù owoy epat agdaw diyà sa muna bulan, migtigdeg a dutu siedò keba sa dakel lawa't wayeg Tigelis. ⁵Agulé egoh ku eglangalanga, hinaa ku sa sebaen etaw migkegal sa ginis lino owoy duen ma sa sabitan di tigtu bulawan. ⁶Egsenang sa lawa di lagà sa mapulù batu topaso, owoy egsindaw sa palas di lagà silà owoy lagà legleg sulù sa mata di. Egsenang sa belad di owoy sa lisen di lagà sa tumbaga kinayaan, owoy metaled sa kagi di lagà sa kelukiyang sa medoo etaw.

⁷Na, aken si Daniyé1 daa sa mighaa iya wé nehauwan. Apiya di pa endà hinaa sa medoo дума ku duu, tigtu da doo nelimedangan, huenan di migpelaguy da owoy miglidung da ma. ⁸Hê, sebaen ku daen sa nesamà, owoy aken daa sa nekehaa sa tigtu mekepesu. Huenan di, migkelusék a owoy tigtu a ma migkelungoy. ⁹Agulé egoh ku egdineg sa kagi siedò etaw, nelipeng a owoy nekelagkeb a ma diyà tanà.

¹⁰Hê, sinabaan di aken anì mekeligkued a ligò di tapay a doo eglukub. ¹¹Agulé mig-ikagi diyà kenak, guwaen di, “O Daniyé1, tigtu eghiduan i Nemula kuna. Tigdeg ka dé, owoy petumàmà ko dinegdineg sa ikagiyen ku diyà keniko, enù ka sinugù a anì tulonon ku kuna.” Hê, egoh di mig-ikagi iya wé, migtigdeg a dé dodoo tapay a doo eglukub.

¹²Agulé mig-ikagi dema, guwaen di, “O Daniyé1, yaka egkelimedangan na. Egoh sa muna agdaw egoh ko anay egsimbà anì metiigan ko sa selepangan sa nehauwan ko owoy egoh ko ma egpetukééy diyà sa kehaa i Nemula, dinineg di dé sa kepegeni ko diyà kenagdi. Huenan di, mig-angay a dini anì uwiten ku sa sagbi sa pinegeni ko. ¹³Dodoo endà daa panay a migtebow dahini enù ka nealang a taman duwa pulù owoy sebaen agdaw danà sa suguy sa tegebantay sa kedatuan diyà Pélsiya. Dodoo si Miguwél sa sebaen kaunutan sa medoo egsugùsuguen i Nemula sa migbulig kenak, enù ka sebaen ku daa eg-atu diyà sa suguy sa tegebantay sa kedatuan diyà Pélsiya. ¹⁴Huenan di, kaini a dé ini egoh di anì ipetiig ku diyà keniko sa mebaelan kani sa medoo дума ko tegeIslaél, enù ka iya sa selepangan sa nehauwan ko sa medoo mebaelan amuk meuma sa hudihudi agdaw.”

¹⁵Na, egoh di eg-ikagi iya wé, egkudung a owoy nebuneg a ma. ¹⁶Agulé sa egsugùsuguen i Nemula éhê palas etaw, inamis di sa tiem ku, hê nekeikagi a dé. Mig-ikagi a diyà kenagdi, guwaen ku, “O Datù, tigtu a egpesu danà sa nehauwan ku owoy nekedian a ma bagel. ¹⁷Ngadan sa ukit keikagi ku diyà keniko enù ka lagà a daa udipen egtigdeg diyà sa taengan sa datù? Endà duen bagel ku owoy endà iseg a egpekeginawa.”

¹⁸Agulé dinulì di dema aken egsabaan. Hê, peanag-anag egpelikù sa kebagel ku. ¹⁹Mig-ikagi diyà kenak, guwaen di, “Yaka egkelimedangan

na, enù ka tigtu eghiduwan i Nemula kuna. Huenan di, yaka egkebukul la. Pebagel ko polo sa pedu ko.”

Egoh di mig-ikagi iya wé, nekepelikù dé sa kebagel ku. Agulé mig-ikagi a diyà kenagdi, guwaen ku, “O Datù, pelagbasi ko sa eg-ikagiyan ko, enù ka pinebagel ko dé aken.”

²⁰⁻²¹ Agulé mig-ikagi, guwaen di, “Enù di ya, netiigan ko pa sa pesuwan ku mig-angay dini? Mig-angay a dini anì selepangen ku diyà keniko sa nekesulat diyà sa libelu sa tuu kagi. Na, pelikù a mangay gumila diyà sa suguy sa tegebantay sa kedatuan diyà tanà Pélsiya. Agulé amuk tabanan ku dé, gilawen ku ma sa suguy sa tegebantay sa kedatuan diyà tanà Gelisiya. Diyà sa kegila ku, endà mekeatu a amuk endà tabangan i Miguwél duu aken. Kagdi sa sebaen egsugùsuguen i Nemula egbantay sa medoo tegeIslaél. [1] Owoy aken sa migtabang si Miguwél egoh sa muna palay i Daliyu tegeMidiya migkedatù.”

Ini Denu Sa Medoo Datù Diyà Igiptu Owoy Siliya

11 ² Agulé mig-uman eg-ikagi sa egsugùsuguen i Nemula diyà kenak, guwaen di, “Tuu ini i tulonen ku diyà keniko. Dumuen sa telu mesesetugdug pedatù diyà sa tanà Pélsiya. Agulé sumetugdug diyà kenagda sa keepat di datù, owoy uman pa dakel sa kekawasaan di diyà sa liyu datù. Hê, egoh di tigtu kumedakel sa egkegaga di danà sa kekawasaan di, enggaten di segilaway sa datù diyà tanà Gelisiya.” ³ Agulé dumuen ma sa sebaen ma datù épê dakel egkegaga pedatù. Melabel sa mesakupan sa kedatuan di, owoy baelan di ma sumalà dé sa ungayà di. ⁴ Dodoo amuk tigtu dé dakel sa egkegaga di, mepalak epat baed sa kedatuan di. Beken dé medoo tugod di sa meketuhì pedatù, dodoo endà meketepeng sa egkegaga da diyà sa hagdi egkegaga.

⁵ “Na, kumedakel ma sa egkegaga sa datù diyà tanà Igiptu. Dodoo dumuen sa sebaen kaunutan sundalu di meumanan pa sa hagdi egkegaga pedatù, owoy mebagel ma sa kesabà di sa hagdi kedatuan. ⁶ Amuk tumalà dé sa pila gepalay, setampilay sa datù diyà Igiptu owoy sa datù diyà Siliya. Ipesawa sa datù tegeIgiptu sa anak di bayi diyà sa datù tegeSiliya. Dodoo endà kumelugay sa keseunutay da sa bayi lapeg sa datù tegeSiliya, enù ka meuma doo sa agdaw egoh da anan meimatayan sa bayi lapeg sa sawa di owoy sa anak di owoy sa medoo egsugùsuguen di kedu Igiptu dò.

⁷ “Dodoo petuhì pedatù sa duma telahadi sa bayi tegeIgiptu. Hê, pengayawen di sa medoo sundalu sa datù tegeSiliya owoy umawuh diyà sa kutà menuwa da anì tabanan di kagda. ⁸ Agulé uwiten di pelikù mangay Igiptu dò sa medoo inetaw egpenemulawen da, lapeg sa medoo

^e 11:2 Mebaluy ma guwaen di, “Enggaten di sa medoo etaw anì meseunat da gumila diyà sa datù tegeGelisiya.”

mapulù sangkap da binaelan bulawan owoy pilak. Dodoo melugay pa sa egoh di endà dé mengayaw diyà sa datù tegeSiliya. ⁹Agulé amuk tumalà sa pila gepalay, mengayaw polo sa datù tegeSiliya diyà sa tanà Igiptu, dodoo mekepelikù diyà sa hagdi tanà enù ka endà mekeatu di.

¹⁰“Dodoo sa medoo anak sa datù tegeSiliya, setiponen da sa tigtu medoo sundalu anì mengayaw da. Lagà sa kedelug sa memahà sa egoh da mangay gumila taman mekeuma da diyà sa kutà sa datù tegeIgiptu. ¹¹Dodoo egbulit sa datù tegeIgiptu, huenan di umatu ma gumila diyà sa tigtu medoo sundalu sa datù tegeSiliya. Hê, metabanan di kagda. ¹²Na, danà di migtaban, huenan di peoldolò dé sa datù tegeIgiptu owoy ngibu-ngibuwan sa kuntelà di meimatayan di. Dodoo endà dé melugay sa egoh di tumaban, ¹³enù ka setiponen dema sa datù tegeSiliya sa tigtu medoo sundalu. Uman pa sa kedoo da diyà sa kedoo da egoh muna. Hê, egoh di tumalà dé sa pila gepalay, pengayawen di dema owoy uwiten di sa medoo sundalu anan épê megamel kinemkem.

¹⁴“Amuk meuma iya wé gai, medoo sa etaw kumuntelà diyà sa datù tegeIgiptu, lapeg sa medoo duma ko mebalaw tegeIslaél. Iya sa baelan da enù ka ungayà da meketuu selepangan sa nehauwan ko, dodoo endà mekeatu da. ¹⁵Agulé pengayawen ma sa datù tegeSiliya sa sebaen dakel menuwa neulingutan kutà diyà sa nesakupan sa tanà Igiptu, owoy seulingutan da anì metepel da sa menuwa. Agulé meuyayaan sa medoo sundalu tegeIgiptu. Apiya sa medoo sundalu nelayam eggila, endà doo mekegaga da.

¹⁶“Huenan di, baelan sa datù tegeSiliya sumalà dé sa ungayà di, owoy endà ma duen sa mekegaga humawid kenagdi. Apiya sa tanà nekepasad i Nemula,^f sakupen di doo owoy megaga di ma pedaetan. ¹⁷Penemdemem di ma sumakup sa tanà Igiptu danà sa kebagel sa medoo etaw nesakupan sa kedatuan di. Agulé setampilay da sa datù tegeIgiptu. Pesawaen di ma sa anak di bayi diyà sa datù tegeIgiptu anì medaetan sa kedatuan diyà sa tanà Igiptu. Dodoo endà meketuu sa penemdem di. ¹⁸Agulé penemdemem di ma mengayaw sa medoo dakel menuwa medapag diyà sa mantadan, owoy atuwan di ma kagda. Dodoo dumuen polo sa sebaen ma kaunutan umatu diyà kenagdi anì mekedan sa kebalaw di owoy anì mekepelikù ma sa mala diyà kenagdi egoh di metabanan. ¹⁹Agulé pelikù diyà sa menuwa di neulingutan kutà diyà sa hagdi munoy tanà. Dodoo mekesugsug dutu owoy endà dé hauwen di etaw.

²⁰“Na, sa datù mekesambi kenagdi, duen sa etaw suguen di atung peetuken sa buwis diyà sa medoo etaw anì meumanan sa egkegaga sa kedatuan di. Dodoo endà melugay di, mekesugsug doo, dodoo beken danà kesegilaway ataw ka beken danà kesebulitay.”

^f 11:16 Iya sa tanà nekepasad i Nemula sa tanà Islaél.

Ini Denu Sa Datù TegeSiliya Tegebael Medaet

²¹Na, mig-uman eg-ikagi sa egsugùsuguen i Nemula, guwaen di, “Dumuen sa etaw dupangdupang mekesambì diyà sa datù tegeSiliya, apiya di pa beken duu tugod datù. Petow dé lumesut enù ka endà peagtem di, dodoo sakupen di sa kedatuan danà daa sa kelugi di. ²²Sa langun kumuntelà kenagdi lapeg sa Tigtu Ulu-ulu sa medoo tegesimbà, anan imatayan di kagda. ²³Medoo sa datù diyà sa medoo liyu tanà duma di sepasaday, dodoo akalan di polo kagda. Apiya di pa tukééy daa sa kedatuan di, kumedakel doo sa egkegaga di. ²⁴Tigkemedan di mengayaw sa kenà sa medoo kawasà etaw diyà sa dakel menuwa, owoy baelan di sa endà nebaelan sa medoo tupù di egoh anay. Agulé taladan di sa medoo etaw di sa nekuwa di danà di eggila. Penemdemen di ma mengayaw sa medoo liyu menuwa neulingutan kutà, dodoo mesagdà sa penemdem di.

²⁵“Pebagelbagel siini datù owoy setiponen di sa medoo mebalaw sundalu anì pengayawen da sa tanà Igiptu. Agulé umatu ma sa datù tegeIgiptu lapeg sa tigtu medoo sundalu di épê megamel kinemkem. Dodoo meakalan sa datù tegeIgiptu danà sa pandapat egbaelan da, huenan di meuyayaan da. ²⁶Iya mendaa sa pedaet diyà kenagdi sa medoo tigtu duma di. Hê, metabanan sa medoo sundalu di owoy medoo ma sa meimatayan diyà kenagda. ²⁷Aglulé siini duwa datù, setugengay da kumaen, dodoo anan da penemdem mael medaet owoy egsebutbutay da. Dodoo endà meketuu sa penemdemen da enù ka endà pa meuma sa agdaw da hinemilì i Nemula. ²⁸Aglulé lumikù sa datù tegeSiliya diyà sa hagdi munoy tanà, owoy uwiten di sa medoo langun taman nekuwa di danà di eggila. Dodoo egoh di pelawà eg-ipanaw, ungayà di kedanan di sa adat kesimbà sa medoo etaw i Nemula, owoy baelan di ma sumalà dé sa ungayà di. Agulé iya pelawà lumagbas lumikù.

²⁹“Aglulé amuk meuma sa agdaw tinapay i Nemula, pengayawen duli sa datù tegeSiliya sa tanà Igiptu. Dodoo tigesas sa mebaelan diyà iya wé gai diyà sa nebaelan egoh muna. ³⁰Tumebow sa medoo baleku etaw tegeLoma anì mengayaw da diyà kenagdi, huenan di tigtu melimedangan. Agulé peesud sa datù tegeSiliya. Dodoo danà di egkelangget, tegpuwan di polo sa medoo etaw epgigtuu diyà si Nemula owoy loyuken di sa medoo etaw uminiyug diyà sa uledin i Nemula. ³¹Aglulé suguen di sa medoo sundalu di anì pedaetan da sa Dalesan i Nemula, owoy hawidan di ma sa uman agdaw kebegay etaw diyà si Nemula. Hê, itenà di ma dahiya sa inetaw tigtu medaet anì medaetan sa kepigtuu sa etaw. ³²Aglulé akalan di ma sa medoo tegeIslaél eg-iniyug dé diyà sa uledin i Nemula anì tumampil da diyà kenagdi. Dodoo kumuntelà diyà kenagdi sa medoo etaw egpangunut diyà si Nemula.

³³“Na, tumulù sa medoo etaw épê keketiig diyà sa medoo liyu etaw, dodoo duen diyà kenagda sa imatayan tigbasen sundang ataw ka ulowen

owoy bilanguwen ataw ka lampasan sa medoo langun taman da. ³⁴Apiya di pa hediya sa ketamanan da, dumuen doo sa tukéey tabang mekuwa da. Dodoo medoo sa liyu etaw ubdubò duma da. ³⁵Meimatayan sa medoo duma kaunutan épê keketiig. Dodoo danà iya wé, kumetiengaw sa medoo etaw lagà sa bulawan tinapis taman sa egoh di endà meuma sa sabuhanan agdaw, sa agdaw tinapay i Nemula.

³⁶“Na, baelan sa datù tegeSiliya sumalà dé sa ungayà di. Pedakelen di ma kagdi enù ka lowonen di gaa sa langun egpenemulawen, owoy apiya sa tigtu Nemula sumbungen di doo. Meketuu sa langun ungayà di taman sa egoh i Nemula migtamay kenagdi, enù ka ipetuu i Nemula sa tapay penemdem di. ³⁷Endà dé adatan siini datù duu sa nemula-egpenemulawen sa medoo tupù di owoy sa nemula egkeiyapan sa medoo bayi. Sumalà dé sa nemula, endà adatan di duu enù ka iya sa penemdem di kagdi daa sa miglowon diyà sa langun. ³⁸Dodoo iya polo sa penemulawen di sa nemula tegebantay sa medoo kutà menuwa, owoy begayan di ma uloy bulawan owoy pilak owoy sa batu mapulù owoy sa medoo liyu langun taman ma. Dodoo endà netiigan sa medoo tupù di iya wé nemula. ³⁹Na, danà gaa sa ketabang siini egpenemulawen di, huenan di pengayawen di sa medoo menuwa épê kutà tigtu megamel. Pedakelen di sa medoo etaw egpangunut diyà kenagdi owoy gelalen di ma kagda kaunutan owoy taladan di ma kagda tanà lagà sa untung da.

⁴⁰“Dodoo amuk buyu dé meuma sa hudihudi agdaw, gilawen sa datù tegeIgiptu dema sa datù tegeSiliya. Hê, umatu ma sa datù tegeSiliya, lapeg sa medoo kalitun di atung gamiten di eggila owoy sa medoo atung tegekudà owoy sa medoo baleku ma. Pengayawen di sa medoo liyu balangan tanà enù ka lagà sa aglas memahà sa ukitan di mengayaw. ⁴¹Ilapeg di ma mengayaw sa tanà nekepasad i Nemula,[§] owoy ngibu-ngibuwan sa etaw imatayan di. Dodoo endà mekuwa di duu sa tanà Idom owoy sa tanà Moab owoy sa baed sa tanà Amoniya. ⁴²Sakupen di sa medoo balangan tanà lapeg ma sa tanà Igiptu. ⁴³Kuwaen di ma sa medoo langun taman kekawasaan, upama bulawan owoy pilak owoy sa medoo mapulù langun taman diyà tanà Igiptu. Owoy lugpien di ma sa medoo etaw diyà tanà Libiya owoy diyà tanà Itiyopiya.

⁴⁴“Dodoo petow dé dumuen sa tulon medineg di kedu diyà tebowon agdaw owoy kedu kimataan sa pesuwan di mebukul. Hê, danà di migdineg iya wé, neapuyan sa pedu di, huenan di mengayaw dema owoy imatayan di sa medoo etaw. ⁴⁵Agulé petigdegen di sa metolol kemalig datù diyà sa neseteliwadaan sa dagat owoy sa getan kenà sa Dalesan i Nemula. Dodoo egoh di dutu, petow dé mematay owoy endà duen sa meketabang kenagdi.”

§ 11:41 Iya sa tanà nekepasad i Nemula sa tanà Islaél.

Ini Denu Sa Mebaelan Amuk Meuma Sa Sabuhanan Agdaw

12 ¹Na, mig-uman eg-ikagi sa egsugùsuguen i Nemula, guwaen di, “Amuk meuma dé iya wé agdaw, tumbow Miguwél i sa kaunutan sa medoo egsugùsuguen i Nemula owoy sa tegetulik sa medoo etaw ko. Agulé dumuen doo sa gai sa tigtu kelikutan, enù ka endà pelà duen sa nebaelan éhê iya wé kelikutan edung egoh sa tanà migduen. Dodoo amuk meuma iya wé, mealukan doo sa medoo etaw ko amuk nekesulat sa ngadan da diyà sa libelu sinulatan i Nemula. ²Hê, umenaw sa medoo etaw nematay. Dumuen sa mebegayan sa lalù endà meelut di, owoy dumuen ma sa mekeangay diyà sa kenà da mepigtamayan taman melugay. ³Sa medoo etaw épê keketiig owoy sa migtulù sa metiengaw adat diyà sa duma da, sumenang da doo taman melugay lagà sa bituen diyà langit.

⁴“Na, o Daniyél, lidung ko pelawà siini medoo inikagi ku taman endà pa meuma sa agdaw di. Dodoo sa medoo etaw, humalihali da polo petulù anì meumanan sa metiigan da.”

⁵Na, aken si Daniyél, egoh ku miglangalanga, hinaa ku sa duwa etaw migtigdeg diyà sa tanà dini owoy tanà dutu sa lawa't wayeg. ⁶Agulé mig-igsà sa sebaen diyà sa egsugùsuguen i Nemula migginis sa ginis lino owoy migtigdeg denu dagel, guwaen di, “Nengan di pa mebaelan siini medoo egkegaipan?”

⁷Agulé sinoyol sa egsugùsuguen i Nemula sa duwa belad di owoy mig-ikagi, guwaen di, “Danà sa ngadan i Nemula sa Nemula épê lalù taman melugay, migpasad a telu gepalay owoy tengà sa lugay di. Amuk meelut dé sa kepelihay sa medoo etaw i Nemula, hê meketuu dé langun ini i.”

⁸Na, dinineg ku sa inikagi di, dodoo endà netiigan ku duu sa selepangan di. Huenan di mig-igsà a, guwaen ku, “O Datù, ngadan sa tigtu tebowon di ini i?”

⁹Migsagbi, guwaen di, “O Daniyél, ipanaw ka dé, enù ka endà pelà meketuu iya wé medoo inikagi ku taman endà meuma sa sabuhanan agdaw. ¹⁰Kumetiengaw sa medoo etaw danà siini medoo kelikutan owoy kumepion ma sa adat da. Dodoo meumanan polo sa medaet egbaelan sa medoo tegebael medaet owoy endà ma metiigan da duu ini i. Dodoo sa medoo etaw épê keketiig, metiigan da polo sa selepangan di.

¹¹“Na, tumalà sa sengibu duwa gatus owoy siyow pulù agdaw edung sa egoh di nehawidan sa kebegay etaw uman agdaw diyà si Nemula owoy sa egoh di ma igtenà sa inetaw tigtu medaet anì medaetan sa kepigtuu etaw. ¹²Dodoo binagian doo sa etaw egtigkel eg-angat-angat taman meelut sa sengibu telu gatus telu pulù owoy lima agdaw.

¹³“Na, o Daniyél, pelagbasi ko sa mepion egbaelan ko taman sa egoh di meuma sa hudihudi agdaw. Apiya di pa mematay ka, umenaw ka doo anì sakemen ko sa niko untung tinapay i Nemula amuk meuma sa sabuhanan agdaw.”